



天津交通銀行同人俱樂部圖書室

左文襄公奏稿卷十六

起同治四年乙丑十月訖十二月

目錄

賊蹤回竄粵境見籌布置情形摺

保奏人員先後異轍請交部察議片

請 獎捐資好義之紳士片

請 獎捐廉助餉之參將片

籌調官軍分路進剿摺

覆陳廣東藩司李福泰粉飾軍務片

貴州玉屏縣鄭氏全家殉難請 旌卹片

籍沒革員資產充餉請毋庸發還摺

奏稿卷十六目錄

瀝陳閩鹽試行票運情形摺

師船巡洋獲盜在事出力員弁懇 恩獎勵摺

請 卹陣亡副將等片

官軍漸偪嘉應見籌合圍情形摺

勦辦龍溪縣屬土匪殄除殆盡摺

陳明廣東兵事餉事片

請將侵挪軍米之知縣革職拏問片

進偪嘉應東路痛勦大勝首逆汪海洋伏誅摺

收復嘉應州城賊首殲斃淨盡餘孽蕩平摺

請 賞給劉典三代一品封典片



鞠訊僞總統胡瞎子凌遲處決片
遊擊英秀罵賊殉難請 優卹建祠片

奏稿卷十六目錄

賊蹤回竄粵境見籌布置情形摺

同治四年十月二十六日

奏爲賊蹤回竄粵境

微臣

見擬相機防剿并籌畫布置情形恭摺

馳奏仰祈

聖鑒事竊

臣前奉

諭旨馳赴粵境調遣廣東江西福建三省兵勇彼時因賊竄江西長甯龍南各地境江西有賊粵東無賊

臣

自毋庸入粵奏懇

收回節制三省各軍成命於十月二十日欽奉九月二十八日

寄諭左宗棠奏逆氛已竄江西勢將於江粵湘三省邊界奪路狂奔該督見駐漳州去賊甚遠兵機最忌遙制請收回節制三省成命等語賊蹤距閩粵較遠左宗棠即可不必入粵惟各路將領必

奏稿卷十六

一

須有威望重臣節制調遣方足以一事權不至各懷觀望致誤事機左宗棠惟當視賊所向前往江西居中調撥相機勦辦以期迅速狂氛俟此股賊匪殄除淨盡方能卸此重任此次所請收回成命之處著毋庸議欽此又於十月二十二日欽奉十月初一日

上諭著左宗棠仍遵二十八日諭旨迅赴江西擇要駐紮居中調度檄飭各軍剋期會剿欽此伏查康逆汪海洋一股由江西定南敗竄廣東連平所轄上下坪一帶時遣賊黨擾及龍南始興邊境意在由南韶奪路竄江西湖南邊界劉典全軍由江西西南康進駐廣東南雄高連陞一軍由廣東河源進長甯扼賊內犯廣東之路黃少春一軍由贛州進駐江西之信豐扼賊旁竄江西之路賊知

去路已斷忽由連平翻山繞竄和平興甯各境所過城邑皆繞道
急趨突犯嘉應頃據遊擊賴長自永定飛稟探報嘉應州城聞已
於十月二十一日賊到時失守旬日之間狂竄數百里其由閩邊
以犯江西之勢已成閩軍悉數入江入粵原爲截賊去路去閩日
遠此次逆賊乘虛回竄一無阻遏閩軍爲賊所隔且東江一帶徧
地土匪楚軍隊伍輜重落後者均被劫殺高連陞劉清亮屢次函
報相同各軍又值疾疫盛行之後疲乏殊甚此次回剿之不能迅
速已在意中查嘉應入閩約有三道一入永定一由鎮平入武平
一由大埔入平和均不過百數十里而永定尤爲衝要臣見飭賴
長率所部勇丁一千嚴扼之復檄藩司王德榜速率所部二千五

奏稿卷十六

二

百人由汀州拔營馳往截剿飛調黃少春由江西信豐過安遠以
扼武平并咨江西撫臣劉坤一嚴扼會昌瑞金與汀州鎮沈俊德
一軍相爲聯絡惟平和一縣僅副將林珠一營駐守兵力太單而
此時實無兵可撥臣擬卽日率親兵八百人并調記名總兵楊和
貴一營出屯琯溪以扼漳州之衝而兼顧平和一路俟各軍到齊
再相機前進督剿如賊竄江西臣自當遵
旨赴江西視賊所向會江西撫臣檄飭各軍相機妥辦所有逆賊
回竄粵境及見籌辦情形謹據實馳奏再臣得報後卽行陳奏
不及與撫臣函商故未會銜合併聲明伏乞

皇上聖鑒訓示施行謹 奏

軍機大臣奉

旨另有旨欽此

奏稿卷十六

軍機大臣字寄同治四年十一月十九日奉

上諭左宗棠奏賊蹤回竄粵境見籌布置情形一摺康逆汪海洋一股由連平繞竄和平興甯各境突犯嘉應該州城池於十月二十一日失守左宗棠見派賴長等軍各率所部分路扼剿所籌均屬周妥該匪旬日之間狂竄數百里其欲由閩邊以犯江西已可概見著左宗棠檄飭派出各軍將由嘉應入閩之路分途堵截遇賊即擊以勦爲防務將此股賊匪迅速掃除肅清疆圉以竟全功該逆既有圖竄江西之勢亟應實力嚴防以扼其紛擾之路著劉坤一督飭防軍認真堵禦并嚴扼會昌瑞金一帶與汀州鎮沈俊德一軍聯絡聲援會籌勦洗爲一鼓聚殲之計嘉應州城被陷著瑞麟郭嵩燾將失事情形并文武下落查明具奏并著嚴飭卓興方耀等軍迅圖克復州城一面將此股竄匪痛加勦洗就地殲滅毋令再竄福建江西等省又成不了之局平和一路兵力較單該督擬出屯琯溪以扼漳州之衝兼顧平和一路卽著移營前進相機布置如賊竄江西并著左宗棠擇要駐紮會同劉坤一督飭各軍視賊所向立圖掃盪該督成算在胸諒能統籌全局迅殄逆氛也將此由五百里各諭令知之欽此

保奏人員先後異轍請交部察議片

同治四年十月二十六日

再十月初八日欽奉

寄諭會憲德一員二年間由左宗棠於年終密考摺內稱其前在延建邵道任內辦事諸多諉卸才識均庸是以有開缺送部引見之旨此次復據該督保奏何以一人之身先後異轍如此著查明

覆奏欽此

臣

維會憲德一員前在延建邵道任內粵賊李阿四竄

入轄境會憲德稟請飭護邵武營參將吳連升扼要防勦吳連升遷延不行致賊勢肆竄地方多被擾害其時會憲德屢次稟陳軍務言賊蹤必至某處某處後果厯厯不爽然於吳連升外別無調撥迨臣參劾吳連升後會憲德又具稟爲之解說臣當將會憲德

奏稿卷十六

五

批飭比卽奏明延汀等處土匪應責成會憲德督率各軍勦辦如再貽誤定將該道將等奏請從重治罪密考稱其諉卸者臣以其有料賊之明而無制賊之效也稱其才識俱庸者臣以其既知吳

連升之遷延貽誤不擇人更換又不嚴其責成也本年春閒李逆世賢踞漳州句結洋人潛謀下海洋官柏威林與之通公然作梗

臣擬以利啖柏威林俾爲我用庶李逆聞而猜懼其交可離與撫

臣徐宗幹密商及之撫臣

臣

謂會憲德在興泉永道任內爲柏威林

所信服宜若可使臣

臣

比卽會銜札委會憲德赴廈門察辦軍務并

令美里登偕行率能鈐制柏威林以斷句通接濟之路并捕獲洋人濟匪者多名亦并未賞以厚資也李逆聞柏威林旋有禁洋人

私通接濟之議懼爲洋人所賣藉所製礮子未能炸裂立斬洋人三名於是李逆與洋人之交始絕臣入漳州尙見洋匪代賊鑄造田雞礮四具銅開花礮子數百枚并洋匪遺棄衣帽多件若當時非會憲德明幹有爲爲遠人所信服得駕馭而牽掣之則漏逸下海一著必所難免臣到漳州後見會憲德所辦諸事尙均妥協晤閒詢其當日在延建邵道時事據稱以其時實無好兵好將又所上公牘多徑抵代辦衙門臣處無從閱悉臣益釋然適值興泉永道鄧廷枏奉

旨升授福建臬司應赴新任臣故奏請以會憲德署理是缺一則人才可用一則中外情形熟習也其兩次奏保該員未將密考絃

奏稿卷十六

六

入者竊以年終密考向無於奏摺中聲明體式遂致過於拘泥上干

詰責此則微臣咎有難辭應請

旨將臣交部察議謹據實覆奏伏候

訓示施行謹 奏

軍機大臣奉

旨知道了左宗棠著加恩免其察議欽此

請 獎捐資好義之紳士片

同治四年十月二十六日

再福建同安縣紳士藍翎鹽運使銜分發廣東試用知府葉文瀾於上年賊陷漳郡時捐資雇募勇船隨同各軍進剿并收養各處難民所費鉅萬漳城克復後辦理濬河修橋舍棺施藥收骸平糶善後諸政又捐銀九千九百餘兩實屬情殷桑梓好義堪嘉又花翎運同銜李瑞岐本年春間在上海與龍溪海澄等縣商人共同捐備火藥二萬斤解閩濟用蘇軍援閩時復雇備夾舨船裝載馬匹軍裝并運米五十六萬斤至廈門平糶亦屬急公好義肯願大局可否仰懇

天恩俯准將葉文瀾俟補缺後以道員仍畱廣東補用并

奏稿卷十六

七

賞換花翎李瑞岐以同知歸部卽選以示鼓勵理合附片具奏伏乞

聖鑒施行謹 奏

同治四年十一月十九日內閣奉

上諭左宗棠奏請將捐資好義之紳士獎勵等語上年福建漳州府城被賊竄陷在籍知府葉文瀾雇募勇船隨同各軍進剿并收養難民及克復後辦理善後各事宜捐銀共九千九百餘兩之多運同銜李瑞岐於本年同商人捐備火藥解閩濟用雇備船隻裝載軍裝等件并運米五十六萬斤至廈門平糶均屬急公好義自應量予恩施分發廣東試用知府葉文瀾著俟補缺後以道員仍

留廣東補用并賞換花翎李瑞岐著以同知卽選以示獎勵該部知道欽此

奏稿卷十六

八

請 獎捐廉助餉之參將片

同治四年十月二十六日會銜

再見護福建甯鎮總兵升用參將建甯左營遊擊劉朝太上年春閒皖南逆匪竄入江西偪近崇浦等邑經劉朝太會同在事文武督帶兵團屢次出關截勦獲勝茲復請將應領建甯左營遊擊任內俸薪乾廉并護總兵任內應得心紅蔬菜等銀三千二百兩零并找司印票銀一千七百兩零合共湊捐銀五千兩一併充作軍餉由軍需局司道具詳奏請

獎敘前來 臣查上年春閒逆匪竄入江西鉛山瀘溪新城等縣偪近閩疆情形緊迫該護鎮督率兵團扼守崇安關隘并屢次出關巡哨擊賊獲勝頗爲出力茲復捐輸廉俸充作軍餉尤屬急公相

奏稿卷十六

九

應請

旨將劉朝太免補參將以副將畱閩遇缺卽補以示鼓勵謹會同福建巡撫 臣徐宗幹合詞附片具奏伏乞

皇上聖鑒謹 奏

軍機大臣奉

旨劉朝太著免補參將以副將畱閩遇缺卽補該部知道欽此

籌調官軍分路進剿摺

同治四年十一月十六日

奏爲籌調官軍分路進剿仰祈

聖鑒事竊臣自聞廣東嘉應州失守卽將籌辦情形馳報一面率親兵及記名總兵楊和貴新右營出屯平和縣琯溪以固漳州南靖門戶遏賊內犯催調幫辦軍務劉典全軍由廣東南雄州取道江西南安贛州入閩署浙江提督黃少春由南安贛州入閩而廣東提督高連陞福建延建邵道康國器署浙江衢州鎮總兵記名提督劉清亮三軍皆隔在賊後無從檄調臣抵琯溪後詢知賊蹤尙未竄動而察江西各軍皆以先固本省疆圉而後徐取遠勢截勦竄賊爲主議論紛紜尙無出境確見適奉

奏稿卷十六

十

諭旨鮑超一軍仍歸臣節制鮑超書來亦亟思隨同臣軍進剿臣

當卽咨鮑超率所部新舊各營一萬二千人入閩分扼武平上杭劉典率所部勇丁八千餘名入閩後徑趨永定其黃少春一軍三千人王德榜一軍二千五百人檄令隨臣進剿旋據高連陞康國器函報已尾賊而來由興甯向東北疾趨高連陞已紮嘉應州東北三十里之葵嶺康國器已紮鎮平縣城其嘉應州城之西三十里藍口地方聞粵軍方耀鄧安邦駐紮其東南一面賴長所部一千人已進紮丙村對河之井塘與惠潮嘉道張銑所派潮州協副將何雲章五品軍功容朝彰之勇丁三千餘名夾河而守是四面布置粗有規模然賊之固於連平上下坪也實垂燼之餘因江西

龍定之軍未及合圍廣東連平之軍未能攔截致旬日之間鋌走嘉應兇賊忽張廣東土匪及遣散之勇從之者眾若復令其颯忽四竄兵事將無了期臣見催鮑超由平遠東石徑趨嘉應西北相公亭一帶俟其到防再令扼要紮營延至藍口畚坑一帶以扼其西其藍口見紮之粵軍俟鮑超到防後當移紮對河之長沙墟一帶憑河而守與丙村諸軍聯絡以扼其南劉典一軍由武平上杭出松源一帶徑抵松口再進與葵嶺高連陞及賴長之軍聯絡以扼其東與南高連陞既進葵嶺康國器一軍應卽由鎮平出三圳新埠墟紫石峰徑東連高連陞軍西連鮑超軍以扼其北賊知東西北三面無路可竄必於南路潮州及豐順揭陽一帶別覓生路

奏稿卷十六

十一

而嘉應南濱支河至三河壩而後入汀州幹河以趨潮州故由嘉應以趨潮州水路之要在三河壩而由嘉應以趨揭陽則言嶺關實當其衝粵軍三千餘分扼兩處兵力尙單而帶勇之員弁一爲前署潮州黃岡協副將遊擊何雲章一爲五品軍功容朝彰臣慮其不足深恃一面飭其深溝高壘嚴斷接濟一面飛咨廣東督撫飭局趕籌製造礮船以扼水路復飭賴長於三河壩上游一帶河道水淺處密釘木椿深處雇船配槍礮手扼之暫濟目前之急務潮州鎮翟國彥及惠潮嘉道張銑督府縣嚴城守臣卽率所部由平和出大埔繞三河壩赴松口將水路形勢察看明白然後折而北趨駐營嘉應州北路將東西兩路各軍分勻派紮漸逼漸進

地近兵多足敷防勦則分兵過河繞紮南路而四面鎖圍之勢可成矣臣維天下髮逆一種僅贖汪海洋而廣東患氣在惠潮嘉三郡茲汪逆回竄嘉應土匪散勇及降人之復叛者多附其中正宜全力兜圍俾無遺種庶可殄餘孽而靖嶺南事關大局不計一時之功效但能草薶禽獮完此浩劫雖曠日持久亦所不惜可否仰懇

皇上天恩寬其督責假以便宜俾得從容就緒不勝感激之至見在署浙江提督黃少春已抵臣營劉典全軍已抵武平上杭可以漸次聯絡齊進惟鮑超一軍尙未得行抵何處信息臣已四次飛催此軍入粵以後人地生疏必須廣東設立米局始免缺乏臣已

奏稿卷十六

三

咨請粵東督撫

臣

委員辦理其月餉由江西籌解伏乞

皇上天恩敕下江西撫臣力籌按月接濟不致如從前新湘長左等營一入閩境卽推置不顧方於大局有益實則此軍進嘉應西路足可屏蔽江西之長甯會昌瑞金筠門嶺一帶所費雖多較之分布各軍株守本境猶爲節省劉坤一深知兵事當亦諒之也謹將見在布置情形據實馳陳伏乞

皇上聖鑒訓示施行謹 奏

軍機大臣奉

旨另有旨欽此

覆陳廣東藩司李福泰粉飾軍務片

同治四年十一月十六日

再臣欽奉

諭旨李福泰是否可用有無粉飾貽誤之處左宗棠此次摺內并
未提及仍著查明具奏欽此臣聞李福泰在廣東作知縣時頗得
時譽於兵事本非所長廣東委其督辦軍務不過責以調和諸將
主餉饋治文書而已不但未親戎馬之事并未假以統馭之權且
其所謂大將者已保至提鎮又皆強很自遂一流進止機宜督撫
尚不得制之李福泰一藩司安能令其俯聽調遣是貽誤之咎李
福泰似有可原也至粉飾一節李福泰於粵東兵事向未兼稟臣
處偶於函牘中略爲敘及亦祇寥寥數語無從測其虛實臣前奏

奏稿卷十六

三

未曾提及蓋以未得實據不敢妄有論列也惟昨次賊由連平上
下坪竄走嘉應時李福泰靦然報攻克追剿之功實則并無其事
卽此以觀則李福泰從前各稟專務粉飾可知謹據實覆陳伏祈
聖鑒施行謹 奏

軍機大臣奉

旨另有旨欽此

軍機大臣字寄同治四年十二月初九日奉

上諭左宗棠奏籌調官軍分路進剿一摺汪逆大股竄踞嘉應州城高連陞已紮嘉應州東北三十里之葵嶺康國器已紮鎮平縣城嘉應城西藍口地方有粵軍方耀鄧安邦駐紮四面布置已有規模左宗棠見擬率所部由平和出大埔繞三河壩赴松口將水路形勢察看明白然後折而北趨駐紮嘉應州北路并飛催鮑超軍入粵所籌均屬妥協見在黃少春已抵左宗棠營劉典全軍已抵武平上杭著左宗棠卽行入粵調度各軍聯絡聲勢將汪逆全股及土匪叛勇盡數殄除勿任再行出竄鮑超一軍前已據奏行抵會昌聽候調遣著該提督卽進兵嘉應會師圍剿聽左宗棠調

奏稿卷十六

十四

遣左宗棠有節制三省之責著於入粵後妥籌調度如江粵各省之兵有疲茶不能得力貽誤事機者卽由該督嚴參治罪瑞麟郭嵩燾卽飭方耀等軍歸左宗棠節制與江閩諸軍聯爲一氣并檄惠潮等郡文武員弁妥籌守禦以防該逆旁竄所需礮船卽飭局趕造以遏水路要衝鮑超一軍入粵人地生疏著劉坤一按月籌餉解濟瑞麟等派令委員設立米局均須寬爲籌備勿任缺乏劉坤一仍當懍遵疊次諭旨催軍出境會剿不得稍存畛域之見左宗棠另片奏遵查李福泰於賊由連平上下坪竄走嘉應覩然報攻克追剿之功實則并無其實屬粉飾廣東布政使李福泰著先行交部議處并著左宗棠察看如始終不能得力卽另揀委員

統帶將該藩司撤回參辦將此由六百里諭知左宗棠瑞麟劉坤
一郭嵩燾并傳諭鮑超知之欽此

奏稿卷十六

五

貴州玉屏縣鄭氏全家殉難請

旌卹片

同治四年十一月十六日

再署浙江甯波府奉化縣知縣鄭錫淖籍隸貴州玉屏縣同治三年十二月初七日逆苗竄陷玉屏該員親母鄭王氏妻鄭洪氏兒嫂鄭侯氏弟婦鄭田氏皆罵賊不屈而死子遇元被苗逆殺斃女二姑以剪刺心同時殉難該員聞變稟報丁憂另由浙江撫臣疏報茲據稟請旌卹前來臣伏查苗逆竄陷玉屏該員全家殉難被害甚慘節烈堪嘉可否仰懇

敕部照例

旌卹出自

天恩謹附片具陳伏乞

奏稿卷十六

去

聖鑒謹 奏

軍機大臣奉

旨左宗棠奏貴州玉屏縣鄭氏全家殉難懇賜旌卹一片貴州逆苗竄陷玉屏署浙江甯波府奉化縣知縣鄭錫淖之親母鄭王氏妻鄭洪氏兒嫂鄭侯氏弟婦鄭田氏皆罵賊不屈而死子遇元被苗逆殺斃女二姑以剪刺心同時殉難洵屬節烈堪嘉著准其照例旌卹該部知道欽此

籍沒革員資產充餉請毋庸發還摺

同治四年十一月十六日

奏爲籍沒革員資產前經變充兵餉請毋庸發還恭摺陳明分別辦理仰祈

聖鑒事竊

臣前奉

諭旨查鈔已革署浙江甯紹台道張景渠原籍江西廣信府上饒縣住宅資財當將鈔出金銀洋錢衣服田地房契等項開列清單於同治元年四月二十四日附奏恭呈

御覽并聲請作何抵撥五月二十八日欽奉五月初十日

諭旨查鈔已革道員張景渠家產甚屬認真所有該革員資產均著變價提充該撫兵餉其餘零星物件卽著賞給營中出力兵弁

奏稿卷十六

七

等因欽此同治四年七月二十二日准辦理通商事務署兩江督

臣李鴻章咨開張景渠前欠交浙海關扣款銀兩見已分結交清奏請將查鈔兩處家產發還收領鈔片咨

臣

嗣閱邸鈔同治四年

七月初三日內閣奉

上諭李鴻章奏請將已革道員家產發還等語已革署浙江甯紹台道張景渠前在關道任內動用浙海關第四五結二成扣款當經降旨將該員家產查鈔備抵茲據奏稱該員前在甯波道任內尙得民心且聯絡弁兵乘閒克復鎮海并克甯波紹興各府城著有勞績前欠銀兩見已分結交清所有張景渠查鈔家產准予發還收領該衙門知道欽此經李鴻章恭錄咨江西撫

臣

行司札

府欽遵辦理茲據原委會同查鈔之廣信府知府鍾世楨以張景渠資產前經變價充餉除未售田畝各契飭縣呈繳給還外錄文稟報請示前來臣查張景渠鈔沒資產業經遵奉

寄諭變價充餉經臣飭鍾世楨將金器發商易換庫平銀六千七百九十九兩八錢九分又原鈔庫平洋銀一百九十九兩一錢足制錢九千八百文又上饒鉛山二縣田產共變價河平洋銀一千一百七十七兩三錢一分先後解交原設信郡臣營後路糧臺驗收充餉其零星物件當經遵賞出力兵弁在案除零星田畝未盡變售外并無存畱在官之物張景渠身任關道甯波失守倉庫錢糧付諸一擲其私家已鈔已變之資產奉

奏稿卷十六

六

旨餉軍張景渠本咎有應得臣遵

旨餉軍并非有意從嚴李鴻章鋪敘張景渠戰功似因臣未爲張景渠奏請開復汲汲表襮起見不知甯波轄境之復張景渠求助洋人并非臣意張景渠當時急在克城又未與洋人要約明白致洋人有所藉口厥後洋人入紹興後多方挾制經臣據理力爭面諭中國有賊應中國自勦無須借助始俯首聽命願受節制自立條約求同征勦臣察其誠心帖服不可過事拒絕且冀其目覩兵力之強或潛銷其桀驁之氣也慨然許之厥後各軍與洋將共事臣皆密飭其勝則相讓敗則救之以導引善機而隱示以自強有具來不拒而往不追之意從此德克碑日意格更壹意傾附不敢

一語抗違是浙江之用洋人與江蘇先時借助洋人繼師其長以圖自強者本有分別至紹興一府洋將華爾勒伯勒東買忒勒相繼陣亡洋兵力攻不克自臣軍克龍游湯溪蘭谿金華諸暨蕭山水師由富陽埭盪而下然後踞紹興之來逆陸順德懼兩面夾攻中阻錢塘江不得飛渡乃宵遁杭州圖與杭湖之逆會合賊退之後洋將德克碑始率所部入城會經臣奏明在案當時臣以此責德克碑不應勒索紹郡捐助之餉德克碑亦無言也是紹郡之復洋將德克碑尚不敢居以爲功何況張景渠借洋將洋兵之力希圖贖死者乎李鴻章於隔省兵事未及詳悉而以紹興之復歸功張景渠并請將奉

奏稿卷十六

九

旨查鈔原籍資產一併發還張景渠收領無論張景渠以甯紹台道棄所轄地方避賊而逃獲咎甚重雖後此藉人之力克復甯波轄地論功未足蔽辜且浙江因張景渠借助洋人之故翻致多費周章其勞績尤難與尋常克復城池并論查鈔資產餉軍臣本遵旨辦理其零星物件既已頒賞將士更復無從追繳今一旦復令發還與前次

諭旨未免有互異之嫌在

微臣

亦難免遷就之咎相應據實陳明

請

旨將浙江前次鈔變張景渠原籍資產一併毋庸發還以明功罪而重

詔令之處伏候

皇上聖鑒訓示施行謹 奏

軍機大臣奉

旨另有旨欽此

奏稿卷十六

滙陳閩鹽試行票運情形摺

同治四年十一月十六日

奏爲滙陳閩鹽試行票運情形恭摺覆奏仰祈

聖鑒事竊臣接准戶部咨開議覆閩鹽試行票運一摺同治四年

九月十五日奉

旨依議欽此欽遵鈔摺飛咨到臣竊維前奏福建試行票運一案

實因鹺務積弊相承漸至不可收拾致

國家自有利源盡供中飽因檢閱舊卷見咸豐元年戶部有就場徵課按包抽稅之奏咸豐三年御史蔡徵藩有修復收稅舊章按照閩省見商完課數目改收場稅關稅之奏皆奉旨詳悉妥議切實具奏維時督撫諸臣皆劫於浮言不敢獨執其咎因循至今全

奏稿卷十六

三

綱頹壞良用慨然因與撫臣會商毅然有改行票運試辦一年之

請初不意遽有成效也旋查自本年閏五月起試行票運截至十

月底止甫及半年鹽庫實支解司暨臣營軍餉已一十五萬兩一

切照例雜支之款亦一萬數千餘兩尙有各商在幫應完未收之

一半課釐約計亦可十餘萬兩伏查同治元年報收銀二十一萬

兩有奇實支解京餉及司庫共祇八萬兩有奇二年報收銀一十

六萬兩有奇實支解京餉及司庫共祇六萬兩有奇兩相比較試

行期內半年之久所收實解之款已抵前此一年及一年半之數

此其明效大驗一覽而知者臣初亦疑奏有所益則下必有所損

課釐并納民或有食貴之虞乃詢諸市價則無所增也贏絀相形

商或有偏累之苦乃察之商情均以爲便也臣方詫爲始願所不及卽當創議之初腹誹而竊笑之者亦爽然若失不敢妄持異議茲閱部咨部臣亦知以閩鹺敝壞爲可慮亦不以票運爲不可行而特以慎重更張預爲詰責於是有四可慮之議如原奏云在前嚴定考成尙有挪移之弊此時免計分數能無侵蝕之虞又云見辦各商一經裁撤萬一新販稀少課額虧短再欲復歸舊章勢有萬難一節臣所以請免計分數考成者以閩鹺痼弊最深驟議改革難求速效是以援照兩浙成案懇請試辦從前考成雖嚴每屆奏銷僅以五分塞責其中虛抵虛收尙復不少見在試辦票運實收實解方且一洗從前挪移陋習從前解款半而今解款倍之其

奏稿卷十六

三

無侵蝕之事可見舊商只令照額認辦分別買票幫銷完繳課釐不准掛欠一切浮費則概行革除并未撤退舊商全招新販向之疲滯口岸自試行新章漸有商販認辦視前此愈派殷富充商以行鹽爲勒捐之計者迴不侔矣此不足慮者一也部議西路商幫額大課重招徠小販力不能勝又苦陋規太多必致捆運無人則不但虧課而且病民夫陋規不除則由昔之道由今之道均一虧課病民豈有力求整飭而不革除陋規之理今西路世業大商仍任其認岸專辦此外官運亦歸一律而自臣衙門至大小鹽務衙門規費一概革除計所裁之數每年不下七八萬兩又停收一切雜支之款是皆向之所謂以陋規太多爲苦者一經釐革淨盡羣

情欣然如沈疴之釋體方且於應完正課外輸釐金捐牙帖開設官行一以彌補雜款一以接濟軍需無加額之名而有裕課之實此不足慮者二也部議開場濱海民風强悍梟販繁多抽釐更難措手師船彈壓萬一辦理不善得不償失臣查此次試辦章程釐隨課出皆取之買票商販并未沿海散抽商販既完課釐成本較重必須官爲緝私銷路乃囑衛商卽所以顧課也數月以來并無私梟拒捕之案如果奸梟滋事則執法懲之豈有慮民強而廢法之理乎至謂閩省從未報解鹽釐遂謂無從措手則未知從前閩事之積玩有非意想所到者沿海州縣多係縣澳官幫平時包與樸戶官但坐收課費以充私橐而報解實銀者寥寥正賦尙缺遑

奏稿卷十六

三

云抽釐今設局招徠不假丁胥之手新販既認口岸與西路商幫無異無不交相奮感以冀暢銷見在縣澳各幫次第遵照新章完納課釐該局隨收隨解并無帶欠蓋挈向時官吏私攫之款涓滴歸之公家名雖取之於商實則變私費爲公帑益上而不損下此不足慮者三也部議閩鹽積欠不下數百萬兩雖未能依限清完而軍務肅清可期漸有起色一旦全議更張欠款未便置之不論如票運僅能保完課額前項已無著落見充各商一經裁撤責令如數完欠恐亦甚難臣查閩鹽積欠已至四百餘萬兩之多此非一朝一夕之事亦非始於軍興之時蓋其積疲也久矣票運僅能保完課額前項固無著落然若不早議變通日復一日前項豈歸

有著乎卽軍務肅清頓如從前無事人物滋豐之時而利孔百出雖行銷日旺亦祇悉歸中飽於國計有何裨益未改票運以前求保完課額而猶有未逮部臣不之責也甫試改票運力顧課額而部臣尙欲求多是舉數十年之不能辦者責望於一時恐管晏竭其才桑孔盡其術而亦有所不能譬如力舉百鈞者如以百鈞之重責其負荷已覺不能日中其程若再累而增之其不致顛蹶者幾何況見雖試行改票專顧課釐而舊欠仍未嘗不按期催繳自四月至十月官欠商欠已收回銀五萬餘兩視前百呼而不一應者亦覺迥異惟閩商資本素微又值彫敝之後責其趕完課釐又責其清完陳欠恐陳欠未必能清而舊商日益倒罷是以請將積

奏稿卷十六

五

欠帶輸等銀分別減免總期商力稍紓漸能照額買票趕運暢銷或可以盈補絀此不足慮者四也至部議以先清埋坎次查戶口出入兼權可得大概議臣原奏未之及一節竊謂清埋坎查戶口本是鹽務常談非救時急務閩省官埋官坎倒廢奚止百年所僅存者多係濱海窮民自行修整非次第清理不能挈私而還之官若驟奪私修之埋坎而歸之官事必有所難行必致如部臣所慮辦理不善得不償失翻不若抽釐之較爲得實至戶口星散稽核難周海濱掬水成鹽人皆食鹽之人卽人皆煮鹽之人必欲計口授食不但徒託空言轉恐益滋煩擾故原奏未之及而但以抽釐權其轉販之鹽也部議務期毫無窒礙確有把握再議試辦果如

部臣所言臣能預知毫無窒礙確有把握則當徑奏改票不必以試行為請試行云者原欲詳察利弊決其可否斟酌行止以俟請旨定奪今必謂試行亦須俟部議而行則凡外吏遇有試行事件均必先咨部臣定議而後入

告亦似與定制不符從前部臣知閩鹺之日壞奏議改章若前任督撫臣肯不計身家利害毅然為

國家長久之計則見在新獲之效早行之十餘年以前計所獲已不下二百餘萬兩何至積欠至四百餘萬兩之多乃從前積欠至四百萬兩不聞部臣參辦責賠茲力排羣議奏請試行而部臣轉持苛論事關

奏稿卷十六

五

國計臣安敢緘默不言總之任法不如任人人存而政斯舉興利不如除弊弊盡而利自生鹽務為腥羶之場為奸弊之藪見效最難致謗則易苟無潔已奉公獨立不懼之員即改行票運臣亦安能保其必無流弊惟據見在而論臣雖不肖斷不敢計及身家利害重負

君父鹽道吳大廷尚知自愛又正當感

恩圖報之時斷無背公營私之理試行期內雖部臣責臣與撫臣鹽道以參賠并稱如該督等不候

命下已竟撤商行票將來課額虧短全綱渙散臣部惟有從嚴參辦并將虧短課款責成率詳之鹽道與率准之督撫分成賠繳以

肅功令而重鹺政臣與吳大廷無所媿亦無所怯也若後此兼管鹽政以及鹽道不得其人則此時試行之章安知非從前相沿之弊是則非微臣所敢任而亦部臣所能議者可否

敕下部臣將閩鹽試改票運應止應行速議具奏俾微臣得免意

外吹求不勝感悚之至至鹽政原督臣兼管與撫臣無涉鹽道雖

係專司之員然舉行票運實微臣一時愚昧之見并疊次函牘責

令毋避嫌怨詳議候核非鹽道所能專似可一併無庸置議所有

此次覆陳由臣單銜拜發之處合併聲明伏候

皇太后

皇上聖鑒訓示施行謹 奏

奏稿卷十六

五

同治四年十二月初九日内閣奉

上諭前因左宗棠奏閩省鹽政疲壞請試行票運一年當交戶部議奏嗣經該部以鹽政改行票運全議更張恐虧課病民咨令該督妥籌期於毫無窒礙茲據奏稱自本年閏五月起試行票運甫及半年所收實解之款已抵前此一年及一年半之數向之疲滯口岸自試行新章以來漸有商販認辦各衙門一切陋規所裁不下七八萬兩羣情翕然且釐隨課出皆取之買票商販并未沿海散抽數月以來亦無私梟拒捕之案從前縣澳官幫坐收課費以充私橐今則挈向時官吏私攫之款涓滴歸公至閩鹽積欠數百萬兩見雖專顧課釐而舊欠仍未嘗不按期催繳請仍敕部將試

改票運行止速行議覆等語覽其所奏於閩省鹽綱之積弊及見辦票運之可行實爲洞悉原委總之鹽務爲國課大宗亦爲奸胥利藪惟在得人而理斯能力挽頽綱票運之行雖不能保其必無流弊儻承辦之員均能潔已奉公不爲私計自足以除從前積重難返之弊而與爲更始該督既稱商情既便市價無增無加額之名而有裕課之實卽著照所請先行試辦一年俟有成效卽行奏明著爲定章以肅鹺政而裕課餉該部知道欽此

師船巡洋獲盜在事出力員弁懇

恩獎勵摺

同治四年十一月二十四日會福州

將軍英桂福建
巡撫徐宗幹銜

奏爲水師兵船在洋獲盜并查明在事出力員弁仰懇

獎勵以昭激勸伏祈

聖鑒事竊照閩省洋面島嶼紛歧海洋遼闊時有盜艇出沒貽害

商漁經

臣

等歷次督飭各舟師認真巡緝茲據具報湄洲洋面有

匪艇三隻擄木商船五號勒人回贖情事經署興泉永道曾憲德

訪聞惟時水師提

臣

吳全美先期出洋當即會商水中軍參將陳

允彩飭委水提右營遊擊陳世榮督帶弁兵會同英國水師官穆

蘭德通事六品軍功呂文經駕坐火輪兵船駛往圍捕水師提

臣

奏稿卷十六

天

吳全美聞報亦飭派儘先副將梁正源等管帶慶瀾兩營紅單拖

舨各船協同剿捕緣輪船駕駛迅速十月初六日先行駛到該匪

艇疑係放回商民報官往拏即將擄禁客商三十餘人一併殺害

棄屍下海遊擊陳世榮英官穆蘭德等督兵併力向前開礮攻擊

匪眾回礮抵禦相拒一時之久斃匪十餘名旋值記升守備水提

右營千總黃安標等管駕靖海輪船由省運餉回廈經過該處馳

往協剿各匪猶敢拌死抗拒復經英官穆蘭德軍功呂文經等環

施洋礮奮勇擊剿轟燬載火藥大匪艇一隻焚溺盜匪甚多千總

黃安標等亦各爭先開礮擊沈小匪艇一隻斃匪數名賊勢不支

紛紛晁水潛逃英官穆蘭德遊擊陳世榮軍功呂文經等生擒艇

匪十一名奪獲盜船一隻千總黃安標拏獲艇匪三名餘匪登岸逃避該處水淺輪船未能駛入適副將梁正源等所部師船於初七日黎明趕到督兵分駛杉板小船上岸沿山搜捕擒獲匪犯九名點交軍功呂文經一併附解統共獲到盜犯二十三名盜船一隻并救回難商六名商船五隻各該員弁仍駕坐輪船管解回廈所獲盜船一隻繫輪船之後途次風濤洶湧輪駛浪激掣斷繫纜隨風漂擊片板無存將救出難民洪向榮等六名連同各盜犯會阿鳳等二十三名解交興泉永道轉發廈防同知提訊解勘其救出難民洪向榮等六名均係附搭杉木船回浙被匪擄禁屬實并查知被擄商船五號尚有舵水在船管駕均經分飭撫恤釋放領

奏稿卷十六

完

回去後旋據廈防同知馬珍訊明犯供開摺稟報內柯月一名亦係木商水手被匪擄禁當飭難民洪向榮等保認提釋暨將餘犯二十二名復解交該興泉永道會憲德親提隔別研訊據盜犯會阿鳳卽阿才供稱伊與賴阿三李阿保黃阿三鄭阿宗范阿禧黃阿義聽從匪首伍阿洗糾約於本年五月閒在洋劫過商船一次得贓分用又先後擄到李阿江鄭阿朴黃阿柏嚴阿真石阿二賴阿妹宋阿二廖阿三袁阿尙等九名上船同夥行劫七月十七日遇見杜阿桂駕船捕魚隨將杜阿桂并水手吳阿水等連船貨一併擄劫伊殺斃水手一人十月初六日又在湄洲洋面牽擄載木商船五隻客商四十一人幼孩二人當時放回一人取銀回贖旋

因輪船往捕疑係放回商人報信即將船上三十四人并幼孩二口一并殺斃丟屍下海尙有六人因輪船偏近未能殺害隨卽併力抗拒船被礮火擊燬經官兵拏獲解訊伊與賴阿三等在洋行劫三次李阿江等行劫二次至杜阿桂吳阿水張阿興梁阿保會阿宗朱阿鍾等六名委係先後被擄在船并無夥劫分贓等語再三究詰矢口不移并據賴阿三等李阿江等同供疊次聽糾夥劫得贓分用各情不諱查該犯等情罪重大見值懲辦洋匪之時未便稽誅應遵前奉

諭旨一併就地正法以昭炯戒隨卽會營監提盜犯會阿鳳卽阿才賴阿三李阿保黃阿三鄭阿宗李阿江鄭阿朴黃阿柏嚴阿眞

奏稿卷十六

三

石阿二賴阿妹宋阿二廖阿三袁阿尙等十四名先行綁赴市曹處斬尙有據報被礮受傷在監病故之范阿禧黃阿義二名照例戮屍一并梟首示眾所有被擄之杜阿桂等六名訊係安分良民業已飭廳取保省釋據署福建興泉永道會憲德稟報前來等伏查盜犯會阿鳳等疊次在洋行劫擄人勒贖迨經兵船圍捕復將擄禁商民幼孩慘行殺害至三十六口之多尤敢糾黨抗拒實屬罪無可道業據欽遵前奉

諭旨一併就地正法以快人心查英官穆蘭德等管駕兵船協獲洋盜業由該道會憲德捐廉犒勞記升守備水提右營千總黃安標通事六品軍功呂文經從前屢次駕駛輪船出洋獲盜奪船著

有功績此次復行協剿艇匪獲犯多名均屬始終奮勉出力合無
仰懇

天恩俯准將記升守備千總黃安標以守備儘先補用并請
賞加都司銜六品軍功呂文經請以把總歸入水提營儘先拔補
以昭激勵除鈔錄全案供招另行咨部外臣等謹合詞恭摺具奏
伏乞

皇太后

皇上聖鑒訓示施行謹 奏

軍機大臣奉

旨黃安標著以守備儘先補用并賞加都司銜呂文經著以把總
歸入水提營儘先拔補該部知道欽此

奏稿卷十六

三

請

卹陣亡副將等片

同治四年十一月二十四日

再查副將何萬華遊擊彭永壽前於同治元年十二月閒隨同藩司蔣益澧會勦湯溪開化等處踞逆憤攻賊壘冒險登壘中礮陣亡又花翎都司羅玉貴係貴州銅仁縣人前於同治三年七月閒隨同候選同知蔡元吉補用遊擊楊應龍駐紮湖州府歸安縣屬思溪地方被賊圍逼楊應龍突圍陣亡該都司亦同時戰歿茲據浙江布政使蔣益澧查明詳請奏卹前來臣查該員等或憤攻賊壘中礮陣亡或突圍殺賊力竭陣亡均屬爲國捐軀深堪憫惻相應請

旨將副將何萬華遊擊彭永壽都司羅玉貴敕部從優議卹以慰忠魂謹附片陳明伏乞

奏稿卷十六

三

聖鑒謹 奏

軍機大臣奉

旨何萬華等均著交部從優議卹欽此

官軍漸偏嘉應見籌合圍情形摺

同治四年十月十二日

奏爲官軍漸偏嘉應

微臣

入粵見籌合圍情形謹據實馳奏仰祈

聖鑒事竊臣於十一月十六日在平和縣琯溪營次業將籌調官

軍分路進剿情形恭摺馳報一面催浙江提督鮑超由平遠趨嘉

應西北幫辦軍務劉典由武平上杭出松口延紮東南其東北之

廣東陸路提督高連陞署浙江衢州鎮總兵記名提督劉清亮兩

軍已於十三日進紮樟樹坪臣在琯溪聞鮑超行抵會昌當卽檄

署浙江提督黃少春記名總兵楊和貴道員朱明亮先進大埔臣

以親兵中哨及馬隊隨署漳州鎮總兵羅大春帶回漳郡協勦土

匪卽率親兵六百人繼進於二十八日在大埔途次接據高連陞

奏稿卷十六

重

劉清亮報稱二十四日卯刻劉清亮由樟樹坪進紮葵嶺前之鳳

寨高連陞派隊列鳳寨之前以防衝突汪逆窺知我軍進紮親率

城壘各悍黨傾巢而出設伏黃竹洋雙板橋一帶劉清亮甫將築

壘賊卽虜至漫山徧野眾約數萬賊騎四五百各帶洋槍悍賊數

人直前衝突高連陞督所部各營六成隊分四路迎敵副將曹光

德遊擊朱體盛都司錢桂仁遊擊陳得勝率各營前敵總兵丁賢

發副將張志公遊擊程學明道員魏光邴率各營接應高連陞率

親兵往來策應諸路朱體盛躍馬當先大呼陷陣連斬騎馬賊目

二人賊以洋槍環擊之朱體盛揮兵力戰刀矛併進斃賊頗多忽

被槍子貫腦墜馬陣亡張志公馳前接戰高連陞復派參將何世

載率洋槍右哨助之賊悉銳分撲我軍亦分路鏖戰賊中槍子紛如雨注曹光德錢桂仁坐馬被子傷乃棄馬步戰該逆前隊已敗後隊迭進錢桂仁身被數創手刃悍賊四名力竭死之高連陞急揮各路接應之兵齊進奮殺丁賢發怒馬當先魏光邴程學明各率親兵繼之矛刺槍擊縱橫盪決高連陞督兵分助各路往來回合數十次各將士裹創血戰自辰至未四時之久戰愈惡而氣愈壯約斃悍賊數百名賊始潰走我軍步偏緊追直至雙板橋邊始收隊而還方高連陞分兵接戰時劉清亮見賊大至勢難分紮營壘因各列陣以待參將陳武職遊擊李世祥爲左路總兵李運榮遊擊孫永忠爲右路劉清亮爲中路屹立勿動俟賊逼近排槍轟

奏稿卷十六

五

之如是數四賊稍卻詎山上之賊復分兩路抄出我軍左路之後先擊卻之又復回撲賊騎數百直前衝突李世祥陳武職奮力迎敵斃賊多名賊來愈眾礮傷我軍哨長二人陳武職右脅爲賊矛刺傷勢幾不支劉清亮抽右路孫永忠往助直陷賊陣所向披靡正酣戰閒被槍子穿傷腰腹猶裹創血戰與李世祥合力將賊擊動汪逆見我軍再接再厲喉白衣悍賊數千直向中路猛衝十餘次劉清亮督隊力戰中營哨長亦陣亡五人而李運榮獨當右路哨長何文祿亦力竭陣亡劉清亮所派同知銜湖北候補知縣汪遇元候選縣丞晏際時持刀壓陣各勇向前奮殺汪遇元晏際時忽中槍陣亡劉清亮與李運榮下馬持矛當先殺賊我軍銳氣倍

長槍矛奮擊斃賊無算賊不能支亦從雙板橋遁去劉清亮與高連陞合隊沿港追殺汪逆猶驅各賊扼橋回抗相持一時許始漸縮退高連陞等以時已薄暮勢難再紮營壘賊雖被擊退然我軍已苦戰一日宜令少歇遂收隊回樟樹坪老營暫駐相機再進是日福建延建邵道康國器一軍已進紮州城北三十五里之烏泥坪二十七日賊眾復傾巢而出圖撲官軍營壘旋自遁回此東北路各軍擊退汪逆大股及北路進紮之實在情形也其東西南三路西路紮藍口之粵軍方耀營盤十六日夜間被賊掩襲小挫東南紫西洋白宮市之粵軍何雲章軍功容朝彰三營二十一日遇賊敗潰失去兩營容朝彰陣亡何雲章退回丙村幸駐丙村對岸

奏稿卷十六

五

井塘之副將銜署福建龍巖遊擊賴長水陸依護得以勉強支持臣得報後卽飛飭按察使銜福建補用道朱明亮帶所部速由大埔馳至三河壩扼賊犯潮郡之路二十九日臣進大埔適幫辦軍務劉典由永定馳至臣卽商請飭其前隊由松口進州城東南之丙村并飭賴長歸劉典節制調遣一面檄黃少春福建布政使王德榜於十二月初二初三等日以次由松口繼進王德榜向塔子坳以扼正東佛子高賊來之路與劉典井塘丙村之營相接黃少春向金谷坑以扼東北葵嶺賊來之路與高連陞樟樹坪之營相接中關黃少春王德榜兩軍又互相聯絡高連陞樟樹坪之營與布政使銜福建延建邵道康國器烏泥坪之營相距不過十里亦

可互相聯絡是嘉應州城東路東南東北及北路長圍之勢漸成然猶去賊二三十里也其所以不欲近偪者以州城西北三十里之相公亭及三十餘里之大坪兩路急盼前調鮑超全軍及江西撫臣檄調席寶田劉勝祥兩軍由江西會昌長甯出平遠進紮相公亭大坪兩路庶可遏其北竄平遠西竄興甯之路見尙未接其到平遠消息師行山谷之間購運軍米極爲艱阻又客軍入粵人地生疏語音更難通曉非粵東設局供應勢難速赴戎機臣已疊次飛咨廣東督撫臣委員設局廣爲採辦并咨江西撫臣速籌撥餉銀三萬兩委員赴粵爲席寶田劉勝祥採辦軍米臣亦勻撥閩餉一萬六千兩爲鮑超採辦軍米如鮑超席寶田等能於旬日內

奏稿卷十六

五

陸續馳至臣當率親兵及記名總兵楊和貴新右營由東南松口繞至東北一路親歷各營共商分布長圍之策大約各軍未集之先各軍營壘宜若斷若續若卽若離令賊不覺一俟各路取齊則剋期併進一面出隊一面築營撒作鎖圍乃能因此殘寇也東西北三面偪緊賊必從西南及南面衝竄臣已飛調粵軍記名總兵鄭紹忠帶所部六千先扼長沙墟如西路江軍延紮而南則粵軍方耀鄧安邦萬餘人可由藍口延紮畚坑長沙墟屆時鄭紹忠又當由長沙墟迤紮而東閩軍可由丙村迤紮而西互相聯絡四面鎖圍庶免流毒他方致成不了之局其嘉應通汀潮之水名曰梅

江賊已先擄民船希圖下竄潮郡臣前飛咨粵東督撫趕緊造船

配礮以防春水暴發又慮新造礮船緩不濟急飭惠潮嘉道張銑
趕調八槳礮船數十號交粵將黃聯開挑募管帶以扼三河壩與
朱明亮陸路之兵緊相依護則全局更無滲漏可望聚殲賊自回
竄嘉應土匪附和者多除死黨悉收入州城外餘黨之紮附城東
西北三面者約五十餘壘兇燄復張臣愚竊擬於此閒調集三省
兵力一鼓殲除不爭數戰之效賊狃於數入絕地復得逸去爲可
常恃故竄嘉應後不圖遽竄機本可乘如果江粵兵力餉事均無
牽制則此局或冀有成臣惟有盡瘁圖之求以仰紓

慈廛所有各戰陣亡之同知銜湖北候補知縣汪遇元候選縣丞
晏際時擬保花翎遊擊銜都司劉永茂蕭勝文劉宣元擬保遊擊

奏稿卷十六

七

銜都司王連斌趙玉林花翎都司何文祿擬保花翎都司銜守備
鄭秀章擬保都司銜守備蕭煥武閩浙補用遊擊朱體盛遊擊銜
閩浙卽補都司錢桂仁擬保花翎遊擊都司銜守備鄭炳禮藍翎
都司銜守備鍾洪霖擬保守備千總鍾成魁擬保參將花翎遊擊
鍾敏遂擬保守備五品軍功容朝彰合無仰懇

天恩敕部一併照擬保升階議卹以慰忠魂伏候

聖鑒訓示施行謹 奏

軍機大臣奉

旨另有旨欽此

勦辦龍溪縣屬土匪殄除殆盡摺

同治四年十二月十二日會福建巡撫徐宗幹銜

奏爲勦辦龍溪縣屬土匪殄除殆盡恭摺奏祈

聖鑒事竊漳州府屬龍溪縣西北二十五都岱山社郭姓一村在漳城西北八十里村中舊有土寨周圍約半里高四五丈累石爲牆排開槍眼形勢險峻儼若一城平日擄人關禁嘯聚搶劫鄰近各鄉往來商旅無不被其擾害上年賊踞南靖該社匪徒郭凸郭好等率眾投入僞來逆陸順德股內受封僞職導賊焚掠二十餘村漳城克後尙復藏畱賊目肆其兇悖靡惡不爲節經汰內社官古社北坑社前山社等處紳民環號聯控訪聞屬實

臣

等以辦匪與勦賊有閒但能細送首惡及著名要犯到官誅治餘眾宜予自

奏稿卷十六

奏

新飭該地方官先諭該村民等縛獻首惡及藏畱髮逆等便准免勦乃該社一味兇頑形同化外經署漳州鎮總兵羅大春署汀漳龍道夏獻綸稟請分別勦辦羅大春輕騎先往該社四面察看見山徑崎嶇間道雜出林深路窄地勢極險非多派弁勇協力兜圍恐多漏網馳赴

臣

宗棠瑄溪行營面商辦理

臣

宗棠立派親兵中哨及馬隊隨羅大春回漳勦辦十一月二十一日羅大春統所部漳勇五百人并率署鎮標城守營都司楊朝陽署右營守備賀知任管帶左右城守三營漳勇二百四十人督同代理龍溪縣楊慶容自漳郡前赴南靖會合楚軍中哨親兵及馬隊星夜前進次日辰刻卽抵該社仍諭細送首要各犯該社匪竟敢揚旂鳴鑼分撲

官軍羅大春列陣以待匪徒衝近連施槍礮斃匪十餘名匪力不支中哨洋槍隊及馬隊四面兜擊又斃匪五十餘名該匪遁入寨樓希圖死拒羅大春飭將寨外匪巢一律平毀飭縣再加開導自午至酉傳諭三次該匪等總恃樓高寨堅死拒不出復密布槍礮子如雨注官軍陣亡三員名受傷二十四員名署都司楊朝陽右手亦受重傷擬保守備藍翎把總楊步高左胸膈中礮子傷羅大春見勢不可已二十三日卽飭各弁勇奮力圍攻一晝夜飛礮入樓火光四起匪多焚斃其奪門奔突及自牆穴跳出者均經兜殺共斃匪二百數十名據獲生匪供稱社內著名要匪郭好等均被官軍焚殺鄰近被害各鄉無不稱快當卽收隊回營自此漳州龍溪著名土匪一律肅清閩里可以安枕所有勦匪陣亡之藍翎千總鄺炳星儘先千總邵來旬應請

敕部照例議卹理合恭摺具奏伏乞

皇上聖鑒訓示施行謹 奏

軍機大臣奉

旨另有旨欽此

陳明廣東兵事餉事片

同治四年十月十二日

再廣東一省兵事實無足觀而餉事亦不可問軍興既久各省兵事或由弱而漸強粵則昔悍而今驚矣各省餉事或由匱而漸裕粵則昔饒而今竭矣自金田寇起制兵不足用不能不召募勇丁天下所同也粵之擇將也尙詐力不尙樸勇所募勇丁皆市井無賴當其從軍也貪狼善擾軍令有所不行及其撤遣則仍爲匪盜而已前督臣葉名琛黃宗漢不知餉薄令弛不能馭將而務爲刻嗇以博綜覈之名於是勇丁每日一錢長夫每日六分之例比及撤遣則又有四六折減給實銀之事自是營官統領於召募之始卽虛增勇數預待駁減募千人者實止六七百又任勇丁來去

奏稿卷十六

學

自由利其截曠爲彌補虧欠及自肥計上有刻薄之名下有遂其浮冒之實將卒均知利而不知義以故索餉則強抗令則強私鬪則強一遇悍寇猝至勉強支吾而守不能固戰不能克矣論語曰好勇疾貧亂也又曰小人有勇而無義爲亂其殆謂今日之粵軍乎此時而欲破除積習轉弱爲強非擇將不可非汰其冗雜虛額之勇丁不可非給以實餉不可然此事非能猝辦也卓輿方耀聞臣入粵未嘗不稍存儆畏之心也稽兩軍積欠之餉共一百數十萬兩粵餉告竭欲撤不能祇可暫寬既往責其實心承奉以圖後效如有違誤再據實嚴參治罪以服其心臣所部入粵諸軍薪糧皆由閩浙支應於粵東諸軍餉事原可不問惟兵與餉二者相因

未有乏餉而能用兵者入粵之初卽詢廣東督撫臣各軍欠餉之數及藩運兩庫與釐稅經入之數准咨開清摺前來合計每月所入不過十七八萬兩而經出之數約近三十萬何怪其日求節省日趨窘迫乎廣東所以素稱饒富者五口未開得專番船之利也近則散之各省而沿海各子口旣以洋人故不敢設局抽釐子口以內釐稅可抽又以地方劣紳挾制頑民抗拒與官爲難播造謠言不能舉辦且恐事未行而科道已指摘及之事甫行而部臣駁斥隨之以是因循不舉坐以待困臣抵大埔接晤潮郡官紳士民詢及潮郡釐稅合計雜貨之釐洋藥之釐汕頭行釐船捐每年所得共止三萬餘兩是一年所入不足六千人一月之餉也潮州爲

奏稿卷十六

聖

粵東腴郡而釐稅之少如此外此已可類推聞海關各口所收每歲不下二百萬兩其解京之數無從稽考此項若能由督撫臣設法籌辦於正供固期無誤而於該省籌餉大局實裨益非淺特此爲二百年舊制非外臣所敢輕議儻能如浙江杭州織務新章之改兩浙紳商士民至今歌頌

聖德與減賦

曠典永戴

皇恩則粵東大局或猶可爲也臣率客軍入粵偶有聞見自不敢

不據實直陳至兵餉兼籌任大責重非明幹開濟之才不能勝任浙江布政使蔣益澧才氣無雙識略高臣數等若蒙

天恩調令赴粵督辦軍務兼籌軍餉於粵東目前時局必有所濟
謹附片陳明伏乞

聖鑒訓示施行謹 奏

軍機大臣奉

旨另有旨欽此

奏稿卷十六

呈

軍機大臣字寄同治五年正月初八日奉

上諭左宗棠奏官軍漸逼嘉應見籌合圍及龍溪勦匪情形各一摺汪逆盤踞嘉應左宗棠籌調各軍分路進剿其東北之高連陞劉清亮兩軍由樟樹坪進紮遇賊於雙板橋一帶血戰數時雖將賊擊退而哨弁傷亡不少東西南三路駐紮之粵軍亦復被賊掩襲或失去營壘是賊勢雖蹙而兇餒頗張該督見進大埔分布劉典王德榜黃少春高連陞康國器等軍互相聯絡嘉應州城東路東南東北及北路長圍之勢漸成正可力圖進取昨據劉坤一奏鮑超已於十二月初六七以次前進平遠之相公亭席寶田劉勝祥兩軍於初九十以次前進東石大柘兩路官軍計日業已到防

奏稿卷十六

星

自可遏其北竄平遠西竄興甯之路卽著左宗棠督飭各軍剋期齊進務期步步逼近合力兜圍毋畱縫隙以收聚殲之效并著瑞麟郭嵩燾檄令鄭紹忠方耀等軍與江閩之兵互相聯絡嚴密布置儻粵省帶兵員弁不能得力致賊鋌走卽由左宗棠嚴參治罪鮑超及江西客軍入粵人地生疏瑞麟等務須設局覓爲採辦軍米以期無誤兵食劉坤一并著迅速前旨出省督飭各軍會攻一面嚴扼本境邊防毋稍疏懈賊見長圍勢合擄船下竄潮郡必在意中左宗棠瑞麟等務當多備礮船飭令黃聯開朱明亮水陸各軍嚴備要隘毋令賊蹤善脫又成不了之局所有此次力戰陣亡之同知銜知縣汪遇元縣丞晏際時擬保遊擊銜都司劉永茂蕭

勝文劉宣元王連斌趙玉林都司何文祿擬保都司銜守備鄭秀章蕭煥武遊擊朱體盛遊擊銜都司錢桂仁擬保遊擊都司銜守備鄭炳禮都司銜守備鍾洪霖擬保守備千總鍾成魁擬保參將遊擊鍾敏遂擬保守備五品軍功容朝彰均著一併照擬保升階交部議卹以慰忠魂龍溪縣土匪郭凸郭好等踞寨從逆怙惡不悛經左宗棠調派羅大春等將該寨匪徒殄除淨盡自此漳州龍溪著名土匪一律肅清實屬大快人心其剿匪陣亡之千總鄭炳星邵來旬均著交部照例議卹另片奏粵東籌餉事宜已交戶部議奏浙江布政使蔣益澧已明降諭旨飭令馳赴廣東辦理軍務兼籌軍餉矣將此由六百里各諭令知之欽此

奏稿卷十六

請將侵挪軍米之知縣革職拏問片

同治四年十二月十二日會銜

再臣此次由漳州進兵取道琯溪平和以出大埔計程雖止三百餘里然所經皆是嶺路山石犖确一徑微茫實爲險絕微臣及同

行各員遇險窄之處皆牽扶步行而長夫之墜巖死者已三人馬之墜巖斃者以十數計矣先時以米糧難於轉運預飭署永定縣知縣李華穠領銀六千兩就近採辦軍米二千石以供來往各軍行糧業據稟報已如數購備嗣飭運解大埔轉運總局忽稱只購到米糧千石有奇前後自相矛盾其侵挪情弊顯然可見除遴員前往摘印接署外相應請

旨將署永定縣知縣李華穠革職拏問以儆貪鄙而重軍務謹會

奏稿卷十六

墨

同福建巡撫臣徐宗幹合詞附片具陳伏乞

皇上聖鑒訓示施行謹 奏

軍機大臣奉

旨永定縣李華穠著革職拏問按律懲辦該部知道欽此

總督瑞麟署廣東
巡撫郭嵩燾銜

進徇嘉應東路痛勦大勝首逆汪海洋伏誅摺
同治四年十二月十七日會署兩廣
奏爲官軍進徇嘉應東路痛勦撲壘全股悍賊大獲勝仗首逆伏誅恭摺馳報仰祈

聖鑒事竊嘉應康逆汪海洋知官軍漸次進紮屢率剽悍騎賊至州東佛子高分水鄉曹塘一帶窺探地勢冀圖設伏以待我軍初至營壘未固猛力衝撲經_臣宗棠商請幫辦福建軍務二品頂帶劉典會同廣東陸路提督高連陞署浙江提督黃少春福建布政使王德榜前往塔子坳分水鄉等處探看形勢剋期滾營進紮并令細探曹塘小路以防該逆設伏包抄本月初十日黃少春王德

奏稿卷十六

吳

榜各率所部分紮橫徑深坑石灰窰一帶十二日五鼓黃少春率其中路中營中路左營及總兵劉端冕楚軍前營由橫徑進紮塔子坳之中右兩路抽派所部及副將馬駿發督標左營謝復雲楚軍湘營之橫徑各老營六成隊幫護築壘以四成隊守老營王德榜率其左後兩營進紮塔子坳之左黃少春王德榜各率親兵列隊策應高連陞暨署浙江衢州鎮總兵記名提督劉清亮布政使銜福建延建邵道康國器各率所部六成勇丁赴塔子坳右路列隊出伏葵嶺山坡劉典飭總兵張福齋率左路五營道員李耀南率後中後勁飛虎三營赴塔子坳列隊策應汪逆先嗾悍黨寅夜由曹塘小路出指湖頂雙坑以抄橫徑一帶營盤之後黎明我軍

在塔子坳築壘忽見賊從左側衝出黃少春王德榜各飭所部槍
紮營壘自率親兵擊退之不逾時汪逆與胡瞎子等率悍賊數萬
分四路蜂擁而來先從旁出二枝一由曹塘小路來者後隊雖被
黃少春王德榜擊卻其前隊已潛抄深坑一帶一由雙板橋潛經
葵嶺均圖抄襲我軍之後又由黃坑出一枝以牽制井塘丙村各
官軍而中路汪逆由佛子高大路胡瞎子等由佛子高黃竹洋緣
嶺左右又分三股狂衝猛撲漫山徧野勢極猖獗張福齋令副將
宋定元軍功王得勝當右路胡瞎子一枝令遊擊張佑廷軍功鍾
榮傑千總向明幹率勇伏塔子坳右松林中以應之張福齋率左
中營及蕭雅泗之先鋒營周玉堂之左二旂李耀南率後中營及

奏稿卷十六

七

田向陽之後勁營已革都司祝鑑嵩之飛虎營當汪逆大股中左
兩枝總兵簡桂林登山瞭望見賊勢洶湧山徑多設埋伏亟率所
部六成隊馳前援應自辰鏖戰至未盪決數十合轟斃及陣斬賊
匪已不下二三千汪逆以中三路均不得逞親率死黨力抗官軍
有不攻破不回城之誓蓋恃有兩路包抄之賊猶冀前後兜撲也
我軍再接再厲無不奮勇爭先適劉典親督老中營及丁大洋副
右營斜出迎擊見指湖頂一枝伏賊已抄出深坑當與李耀南定
計先擊此股卽飭丁大洋率所部疾馳上嶺老中營應之并調齊
蘭禮率副中營助勦黃少春王德榜塔子坳營壘已成皆出隊夾
擊各營將弁皆舍騎步戰擐旂陷陣軍士皆以一當百槍礮環轟

聲震山谷逆黨死傷甚夥黃少春所部橫徑各營王德榜所部深坑各營亦一齊出隊奮擊黃少春王德榜各率親兵緣崖而出以橫截之賊遂敗走我軍乘勢掩殺斬馘不可勝數而汪逆大股尙在前抵死撐拒經張福齋李耀南與蕭雅泗等麾兵痛勦該逆亦殊死鬪正酣戰閒簡桂林與哨長甘大有鄒正魁等下馬持矛大呼衝陣賊眾勢如山頽我軍奮威衝殺矛刺槍擊賊屍枕藉直追至佛子高時已酉刻始各收隊歸途見大戰處血漬滿蹊徑澗水盡赤其雙板橋一枝抄後之賊經高連陞督親兵洋槍馬步各隊橫出分水鄉以斷賊後令道員魏光邴率副將黃北海遊擊陳得勝由葵嶺翻山斜趨分水之右待賊退時攔截之飭總兵丁賢發

奏稿卷十六

吳

副將曹光德張志公遊擊程學明合劉清亮康國器所部列隊之兵分三路直向雙板橋迎擊高連陞督親兵從分水鄉山徑出賊不意開槍轟擊逆眾在前者甫抄出橫徑後面之玉水見歸路已斷遂大驚亂適劉典黃少春王德榜各軍合兵衝殺賊遂紛紛從分水右側山下奪路潰奔魏光邴等伏山腰林木中橫槍擊之賊眾自相蹂藉不敢仰視高連陞從後追殺斃賊數百名生擒二十九名雙板橋餘賊不敢戀戰鼠竄回奔我軍追至黃竹洋沿途轟斃不少其黃坑一路之賊見我軍後路有備未敢渡河下竄據各軍獲生賊供并乞降賊首來稟僉稱首逆汪海洋被槍子從頭左偏穿出兩眉之際立卽墜馬比昇回州城則已氣絕

臣

宗棠初猶

未信比接各軍探報一一相符且各賊具稟赴營乞降者兩日之間已三四至觀其紛擾情狀知汪逆之陣前轟斃確無可疑計是戰共斬悍賊數千名轟傷截傷者無數可計墜崖死者約數百名生擒二百餘名奪獲槍械無算賊馬數十匹諸將士皆言逆賊是日分布之密搏鬪之苦實爲從征數年來所僅見蓋狃於近來未經痛創而所糾賊黨所收叛勇皆兇悍百戰之餘土匪又熟習路徑從而導引之故膽大氣驕如此此十二日各軍血戰竟日大獲全勝之實在情形也是役也劉典黃少春高連陞同心共濟謀勇兼資在事將士踴躍用命勇氣百倍仰賴我

皇上天威殲除首逆見據賊中諜報賊黨因汪逆伏誅推僞偕王

奏稿卷十六

兇

譚體元爲首賊首如胡瞎子汪麻子黃矮子何明亮等皆踞紮城內外人數尙多必須速合長圍令飛走絕迹然後誅其桀悍宥其脅從勦撫兼施可以蕲事臣宗棠拜摺後卽率親兵及記名總兵

楊和貴新右營由松口前進先檄高連陞由東北葵嶺進紮黃竹

洋黃少春王德榜由正東分水鄉進紮佛子高延紮而北與高連

陞黃竹洋之營相接浙江提督鮑超十三日抵平遠康國器接其

途次來函謂十五日可進州西北相公亭已飭康國器俟鮑超營

盤紮定卽會期列隊徑由烏泥坪進紮州正北洋門岌要隘右與

鮑超左與高連陞聯絡咨商鮑超進紮西北平成鋪石壁宮前一

帶并飛催席寶田劉勝祥兩軍速進西北大坪堡飭道員朱明亮

桂營進紮井塘使劉典全軍得由正東趨東南之白宮市西洋龍津橋進紮黃坑渡再進至芹菜洋自東南隅右旋至西北隅各軍密布則正南西南正西各路更宜防賊衝竄粵軍方耀鄧安邦一萬四千人扼西面藍口一處前調粵軍鄭紹忠所部六千人又添調粵軍曾敏行一千五百人迭飭會同進紮西南之長沙墟尙未卽進臣宗棠又飛檄督之責其速紮以彌西南一隅罅隙更調新募入槳礮船抵南路水陸依護以成鎖圍期竭鴛鴦迅速蔽役仰

紆

宵旰慈廬此次尤爲出力之記名閩浙總兵傑勇巴圖魯簡桂林擬保閩浙補用總兵揚勇巴圖魯張福齋懇

奏稿卷十六

辛

恩賞換清字勇號遇有閩浙總兵缺出題奏請

旨閩浙補用總兵格洪額巴圖魯劉端冕可否以總兵記名請旨簡放按察使銜浙江補用道李耀南請

賞加二品頂帶總兵銜副將馬駿發請以總兵補用畱浙副將樂連生擬保畱閩副將甘大有閩浙儘先補用副將劉傳儀畱浙副將高方吉均請

賞給勇號樂連生并請

賞加總兵銜擬保畱閩儘先副將周玉堂請

賞給勇號副將銜畱閩參將謝復雲補用參將宋成祥藍翎遊擊張佑廷均請以副將畱閩補用張佑廷并請

賞換花翎副將銜參將戴清輝鄒玉林杜登雲吳茂軒均請以副將畱於閩浙遇缺卽補參將鄒正魁花翎參將李銘新姚連陞均請

賞加副將銜花翎儘先遊擊余宏亮請以參將畱於閩浙卽補遊擊張金榜黃復勝陳厚順均請以參將畱於閩浙遇缺卽補花翎畱閩都司蕭雅泗田向陽均請以參將仍畱閩補用先換頂帶花翎都司羅東成湯世成周繼世藍翎都司陳龍香均請以遊擊畱於閩浙補用花翎畱閩都司劉甫田請以遊擊仍畱閩補用擬保花翎守備黃文光藍翎守備謝紅蛟均請以都司儘先補用守備余洪勝林三友秦添福江同恩陳殿立葉義秀均請以都司補用

奏稿卷十六

三

藍翎千總向明幹請以守備儘先補用并

賞加都司銜軍功鍾雲傑請以千總儘先拔補并

賞戴藍翎軍功宛乾元張興發均請以千總卽補并

賞戴藍翎軍功范振升請以千總卽補并

賞加守備銜已革都司祝鑑嵩請開復原官并免繳捐復銀兩其餘在事出力員弁可否由臣宗棠存記彙案保獎之處出自

天恩其陣亡之擬保畱閩儘先副將陽命伸副將趙輝元應請

旨敕部均照總兵例議卹副將銜閩浙補用參將周壽臣請照副將例議卹花翎都司歐隆勝施輝林章海輝均請照都司例議卹擬保守備蔡文蔚請照守備例議卹藍翎外委蔡名吉請照千總

例議卹其餘傷亡各弁勇再行分別核辦所有十二日大獲全勝首逆伏誅緣由謹合詞恭摺馳奏伏乞

皇上聖鑒訓示施行謹 奏

同治五年正月十五日內閣奉

上諭左宗棠等奏官軍進逼嘉應東路痛勦撲壘賊匪大獲勝仗首逆伏誅一摺逆首汪海洋盤踞嘉應州城經左宗棠調派諸軍分路進攻上年十二月十二日官軍由嘉應州城東橫徑地方進紮塔子坳中右兩路甫經築壘該逆已由左側衝出經提督黃少春布政使王德榜親督兵勇擊退該逆復率悍黨數萬三路來撲并分股潛抄深坑葵嶺等處圖襲官軍後路又由黃坑另出股匪

奏稿卷十六

五

牽制井塘丙村諸路官軍漫山徧野勢極猖獗官軍分路迎擊其前一面派兵截勦山徑埋伏及抄出深坑之賊各營齊出廝戰山谷逆黨死傷甚多深坑之賊亦皆敗走汪逆大股仍在前路抵死抗拒官軍合力酣戰總兵簡桂林等率眾下馬奮力衝陣賊眾勢如山頽屍骸枕藉血滿蹊徑澗水盡赤其由雙板橋一路抄後之賊亦經提督高連陞等督兵截擊并分路繞出橫徑後面玉水地方斷賊歸路由山腰林木中伏槍橫擊殺斃賊匪不計其數詢據官軍所獲賊供僉稱首逆汪海洋頭左被槍子中傷由眉際穿出立時墜馬氣絕實足以伸天討而快人心著左宗棠迅督各路官軍四面合圍將餘黨速行殄盡毋畱餘孽所有尤爲出力之總兵

簡桂林著賞換鏗僧額巴圖魯名號張福齋著賞換達桑阿巴圖魯名號以上二員均著遇有閩浙總兵缺出題奏劉端冕著交軍機處記名遇有總兵缺出請旨簡放道員李耀南著賞加二品頂帶副將馬駿發著以總兵補用樂連生著賞給力勇巴圖魯名號甘大有著賞給武勇巴圖魯名號劉傳儀著賞給果勇巴圖魯名號高方吉著賞給效勇巴圖魯名號樂連生并賞加總兵銜周玉堂著賞給協勇巴圖魯名號參將謝復雲宋成祥遊擊張佑廷均著以副將畱於福建補用張佑廷并賞換花翎參將戴清輝鄒玉林杜登雲吳茂軒均著以副將畱於閩浙遇缺卽補鄒正魁李銘新姚連陞均賞加副將銜遊擊余宏亮著以參將畱於閩浙卽補

奏稿卷十六

三

張金榜黃復勝陳厚順均著以參將畱於閩浙遇缺卽補都司蕭雅泗田向陽均著以參將仍畱福建補用先換頂帶羅東成湯世成周繼世陳龍香均著以遊擊畱於閩浙補用劉甫田著以遊擊仍畱福建補用守備黃文光謝紅蛟均著以都司儘先補用余洪勝林三友秦添福江同恩陳殿立葉義秀均著以都司補用千總向明幹著以守備儘先補用并賞加都司銜軍功鍾雲傑著以千總儘先拔補并賞戴藍翎宛乾元張興發均著以千總卽補并賞戴藍翎范振升著以千總卽補并賞加守備銜已革都司祝鑑嵩著開復原官并免繳捐復銀兩其餘在事出力員弁著准由左宗棠存記彙案保獎候旨施恩陣亡之擬保畱閩儘先副將陽命伸

副將趙輝元著照總兵例議卹副將銜閩浙補用參將周壽臣著
照副將例議卹都司歐隆勝施輝林章海輝均著照都司例議卹
擬保守備蔡文蔚著照守備例議卹外委蔡名吉著照千總例議
卹該部知道欽此

奏稿卷十六

奏

軍機大臣字寄同治五年正月十五日奉

上諭左宗棠等奏官軍進逼嘉應東路痛剿撲壘悍賊大獲勝仗首逆伏誅一摺已明降諭旨宣示將出力之總兵簡桂林等均照所請獎勵陣亡副將陽命伸等交部議卹矣康逆汪海洋知官軍漸次進紮率領全股悍賊乘我軍初至營壘未固猛力衝撲經劉典黃少春高連陞同心共濟謀勇兼資在事將士踴躍用命勇氣百倍大獲勝仗殲除汪逆自應乘賊勢新挫之時一鼓作氣聚而殲旃左宗棠見率親兵由松口前進飭令高連陞等軍分布各路四面兜剿布置甚合機宜即著督飭各軍合力進逼嚴密堵剿其方耀鄧安邦鄭紹忠等軍并著瑞麟郭嵩燾飭令迅速進紮儻敢稍涉遲延致罅隙未彌賊得竄突必將該員等從重治罪鮑超已抵平遠著左宗棠調令進屯西北平成鋪一帶會師剿賊并著劉坤一迅檄席寶田等軍由西北步步進兵務令四面合圍使此股殘寇飛走路窮盡行殄滅以彰天討而靖疆圉有厚望焉將此由六百里各諭令知之欽此

收復嘉應州城賊首殲斃淨盡餘孽蕩平摺同治四年十二月二十九日會署兩廣總

督瑞麟署廣東巡撫郭嵩燾并江西巡撫劉坤一福建巡撫徐宗幹銜

奏爲官軍圍偪嘉應逆匪宵遁各軍分路截剿均獲大捷賊首殲斃淨盡州城收復餘孽蕩平恭摺馳報仰祈

聖鑒事竊自十二日之戰汪逆伏誅後僭王譚體元代統其眾

與胡瞎子等負隅死拒尙敢抗我官軍圍撲東路營壘經幫辦福

建軍務二品頂帶劉典廣東陸路提督高連陞署浙江提督黃少

春福建布政使王德榜會商聯營進紮臣宗棠復飭道員朱明亮

桂營進駐井塘顧各軍後路每日出隊協護築壘於十九二十兩

日高連陞黃少春王德榜各軍環偪州東北東面之黃竹洋佛子

奏稿卷十六

奏

高曹塘一帶而營劉典督所部福建福甯鎮總兵劉明燈總兵簡

桂林道員李耀南等於十八日冒雨進紮西洋市十九日雷闔補

用副將署龍巖遊擊賴長水陸三營進扼龍津橋并飭各軍於西

洋搭造浮橋夾河併進該逆見我軍彼此列隊聲威極壯不敢復

犯適浙江提督鮑超全軍於十七日抵州西北三十里之相公亭

十九二十兩日率隊至平成鋪山子下築壘廣東布政使李福泰

亦至州西藍口令總兵方耀都司鄧安邦所部至古塘坪列隊與

鮑超爲犄角之勢十九日該逆出七樹徑直撲粵軍方耀鄧安邦

扼金雞石坳口列陣以待賊分三路猛撲數次方耀等分途迎擊

自午至酉鏖戰四時將賊擊敗斃賊百餘名生擒一名我軍陣亡

三名二十日鮑超出隊相視營地譚逆復率悍黨分股來撲鮑超令提督唐仁廉等由中路進已革提督譚勝達等由左路進總兵曾成武等由右路進以提督李文益總兵銜副將龔占鼈記名總兵貴州清江協左營都司羅運昌等分路策應總兵段福記名提督直隸正定鎮總兵婁雲慶分率各營左右抄擊唐仁廉等擊退中路之賊左右路賊黨尙蜂擁而來譚勝達等奮力猛擊斃賊甚眾左路賊亦潰會成武鏖戰一時與已保守備顧惟奇皆受子傷裹創血戰力將右路賊擊敗乘勢追殺婁雲慶率副將徐連陞等橫截之賊益驚亂鮑超督各軍掩殺直追至城下而返斃賊四千餘名生擒老賊二百餘名我軍陣亡弁勇四十名此十九日二十

奏稿卷十六

七

日兩軍擊賊獲勝之實在情形也汪逆伏誅賊中膽落又不得逞於西北臣宗棠料其必圖速竄咨行各軍統領迅合鎖圍以便剿

撫兼施免其漏逸而州南一面必須粵軍迺紮而東閩軍迺紮而西方無罅隙粵軍總兵曾敏行副將鄭紹忠十八日進羅衣堡擬俟二十二日進州西南十五里之長沙墟延紮州南之小密而劉典所部總兵張福齋二十一日已進紮黃坑芹菜洋之間距州南稍東不過數里江軍記名布政使貴州按察使席寶田總兵劉勝祥兩軍十九日馳紮大坪後臣宗棠飭其延紮州西面一帶以便藍口粵軍方耀鄧安邦延紮州西南之大乍堡三門坳策應曾敏行鄭紹忠俾可速由長沙墟進偏州南與閩軍聯成一氣臣宗棠

於二十一日率親兵及總兵楊和貴新右營前進二十三日巳刻在州東三十里之井塘途次接據各軍稟報賊於二十二夜二更後潛啟西南門由小密出黃沙嶂而遁胡瞎子當先譚逆及各賊首斷後幸劉明燈先遣降賊入城偵探至是到營飛報劉明燈與簡桂林賴長立率所部疾趨黃沙嶂一路追截黃沙嶂者州南狹隘羣峰峭削一徑縈紆爲嘉應出新田大田右至豐順左至潮州之間道賊以數萬之眾冒死出險急不得前劉明燈簡桂林賴長馳抵泮坑斬殺尾賊數百名生擒三十餘名追過小密遇鄭紹忠安勇營盤彼此不相識別混戰一時天明始各向黃沙嶂併力追擊復斃賊二千餘名生擒五百餘名先是賊目劉廷貴沈文有等

奏稿卷十六

奏

已輸款於黃少春城賊出走時沈文有飛報各軍高連陞黃少春與記名提督署浙江衢州鎮總兵劉清亮四鼓率隊入東門搜勦餘賊副將馬駿發追至南門外水南壩河邊排槍擊之轟溺甚夥僞佐將劉廷貴率三壘之賊投降黃少春軍前其另股千餘人赴劉典軍前乞降高連陞王德榜布政使銜福建延建邵道康國器各軍徑向黃沙嶂追勦鮑超督所部入州城旋即派隊繼進劉典率所部追及小密長沙墟黃少春亦至各路官軍齊進山路偏窄不能容眾因回營安插降眾遣難民張福齋李耀南追至合溪斃賊不可勝計方耀鄧安邦由七樹徑三門坳大乍堡過河追擊亦至黃沙嶂而返此二十三日黃沙嶂以北各軍追勦受降之實

在情形也其過黃沙嶂者劉明燈簡桂林賴長緣崖衝殺該逆初猶死鬪經各軍奮力壓勦逆眾喪膽狂奔我軍乘勢痛勦如摧枯拉朽殺不勝殺斬賊目二十餘名賊三千餘名生擒千餘名墮崖落澗死者人以數千計馬以數百計解散難民數千名奪獲賊馬五百餘匹偽印數百餘顆槍械無數我軍陣亡勇丁數名正追殺閒高連陞劉清亮又至合兵縱擊追至土地園賊眾狂奔豕突高連陞劉清亮率總兵丁賢發道員魏光邴副將曹光德張志公黃北海遊擊孫永忠陳得勝等奮威勦殺槍擊矛刺斃賊極多直至分水坳劉明燈等因將士夜半出隊窮追竟日飢疲特甚且鮑超王德榜康國器各軍又已踵至前路愈形擁擠乃收隊回營高連

奏稿卷十六

堯

陞等追殺至新田少憩覓食鮑超前隊又至三更後高連陞等整隊急追黎明及賊於大田該逆大股麴聚猶抵死奪路而奔我軍奮勇掩殺又追二十餘里賊屍枕藉被脅賊黨伏地乞降者約萬餘人高連陞受之搜斬叛勇頭目歐陽輝及逆首賴裕新卽賴剝皮之母梟首軍前悍賊猶越嶺狂竄我軍四路搜殺計又斃賊二千餘名奪賊馬千餘匹槍礮五百餘件高連陞劉清亮暫駐大田督隊搜捕餘賊至長崑見高山密林中一黃衣賊擁賊千餘人蟄聚伏匿亟飛登山頂逆眾駭奔丁賢發直前奮擊手擒黃衣賊乃偽總統胡瞎子卽永祥也餘賊悉降又搜二十里遇粵軍於嶺脊詢知附近并無賊蹤始收隊回其王德榜一軍由黃沙嶂左路追

殺二十三夜及賊於北溪該處四圍皆山賊眾徧野我軍扼其去路登高呼曰降者棄械上山偽右先鋒眉天義曹玉科偽前鋒鈞天義楊世如偽會天福何玉清偽天將彭大貴偽神將馬有玉及偽天義天福彭大元劉福勝等率眾跪馬前泣求免死王德榜受之約四萬人鮑超所部二十三日由黃沙嶂左路追至北溪白沙壩何明亮黃矮子等仍思抗拒唐仁廉率各營縱擊總兵銜副將孫開華等由右路擊賊之腰譚勝達等由左路越嶺將賊截斷逆眾大潰各軍連夜躡追唐仁廉率洋槍八營由兩崖小徑乘夜疾繞賊前二十四日黎明該逆復嗾黨拚死奪路狂衝數次鮑超親率駐城十營由小路追及飛令唐仁廉扼塞前途山銜副將楊

奏稿卷十六

本

德珍率兩營抄捷徑而前爲唐仁廉後應譚勝達孫開華等由左右山岡壓下殺福率五營往來策應婁雲慶由中路進擊參將鮑昌壽應之鮑超麾兵奮威齊進逆眾向前鼠竄唐仁廉排洋槍環擊孫開華等由右路疾馳而下逆眾撲跌落崖者甚夥婁雲慶在中路奮勦譚勝達自左側抄出乘勝喊殺唐仁廉等不避險阻愈戰愈奮將賊截作數段屍橫徧野積械如山兩日共斃賊八千餘名墜崖死者難以數計逆眾見四面皆已被圍始羅拜求生當將二萬餘眾一律兜擒查出偽忠誠天將何明亮偽大佐將何明輝戴禮煌偽佐將蕭秋林偽朝將黃壽發偽先鋒鍾有誠黃正元劉明盛偽膾天義吳慶寶偽奮天安廖大順偽祈天安楊文魁偽袁

天義袁戴春僞意天豫鍾意興僞段天福巫得盛僞陳天安陳世路僞衛國侯龍大賓及張孟元黃茂林黃得勝吳水源張元柏及叛勇頭目黃矮子等陸續誅磔其僞侯丁德泰等大小頭目七百三十四名亦經訊明軍前正法惟康國器一軍從右路攔擊尙未接其稟報計斬擒亦必不少此二三四兩日黃沙嶂以南各軍窮追痛埽分別勦撫之實在情形也臣宗棠於二十三日聞報後以各軍所收降賊僉稱譚逆因官軍圍逼泣商各賊首欲西竄興甯和平以趨廣西胡逆不允堅欲由豐順潮州一帶竄越閩浙邊界以歸皖南等語賊蹤既趨豐順縣境距潮郡不遠當卽飛飭潮州文武固守城池一面飛調三河壩篷萊灘礮船五十號迅赴甯

奏稿卷十六

全

隍以扼要津并將追賊各軍已收隊者抽撥前往潮郡水陸依護防守臣宗棠於二十五日折回松口卽向甯隍進發仍飭席寶田劉勝祥扼興甯以固江西藩籬粵軍方耀等四軍共扼長樂永安之衝以固惠州門戶檄高連陞劉清亮所部在嘉應者分紮州城及長沙墟一帶令鮑超及閩軍之未收隊者跟蹤追勦無論該逆向惠向潮均以盡賊爲度旋據各軍報稱二三四兩日追至北溪白沙壩距豐順縣尙四十里全股業已蕩平臣宗棠自可無須馳赴潮郡卽在松口暫駐將降眾分別辦理擬將其著名桀黠罪惡貫盈者仍從嚴懲處其情罪可原者應卽免其駢戮給護票散遣回籍以廣

皇仁仍挑其精壯分隸各軍暫給口糧以俟分起遣散伏查嘉應城踞逆不過十萬餘眾綜計各軍擒斬轟斃之賊實一萬六七千名生擒數千名墜崖死者不計其數解散難民萬餘先後收降五萬餘人奪獲賊馬一千六百餘匹偽印旂幟槍礮器械拋棄滿途拾不勝拾而此股各首逆譚體元被首先追及之圍軍於黃沙嶂北槍傷墜馬落崖死胡瞎子爲高連陞所部生擒何明亮黃矮子爲鮑超所部擒斬汪麻子亦中槍殞命殲除殆盡無一漏網卽多年稽誅之積賊與近時投附之叛勇本地從賊之土匪亦皆撲滅無遺此固非_臣等始願所及也仰蒙

皇上聖謨廣運將士用命一旬三捷將十餘年髮逆種類一鼓蕩

奏稿卷十六

奎

平從茲海澨山陬兇悖之民當益震懼

天威不敢狡焉思逞而東南各省亦可脫甲解嚴與民休息矣此次尤爲出力之記名提督唐仁廉已請開復遇缺題奏提督譚勝達記名提督直隸正定鎮總兵婁雲慶擬保記名提督總兵曾成武可否懇

恩從優獎勵擬保提督銜記名總兵副將孫開華可否交軍機處記名遇有提督總兵缺出請

旨簡放擬保記名提督總兵鄧訓誥請以提督遇缺題奏記名提督彪勇巴圖魯蕭得龍記名提督署浙江衢州鎮總兵靖勇巴圖魯劉清亮記名提督智勇巴圖魯李運勝提督銜記名總兵勝勇

巴圖魯黎榮鈞并請

賞換清字勇號提督銜福建福甯鎮總兵劉明燈請

賞給清字勇號擬保遇缺題奏并請換清字勇號之記名閩浙總兵簡桂林閩浙總兵張福齋及記名總兵楊和貴擬保記名總兵劉端冕擬保總兵蕭連貴閩浙總兵丁賢發均請

賞加提督銜丁賢發并請

賞給清字勇號記名總兵齊蘭禮請

賞給該員三代二品封典擬保總兵馬駿發請

賞給勇號暫行革職記名總兵方耀請開復革職處分擬保總兵銜畱川副將龔占鼇副將張志公曹光德可否均以總兵記名請

奏稿卷十六

旨簡放龔占鼇并請

賞加提督銜總兵銜副將張再勝兩江補用副將賴光斗喻名揚副將銜參將涂祖昌均請以總兵補用并均請

賞給勇號畱閩副將著勇巴圖魯賴長請

賞換清字勇號并加總兵銜副將徐連陞擬保副將江自康易進春均請免補副將以總兵補用并均請

賞給勇號總兵銜閩浙副將宋定元總兵銜副將陳集賢均請

賞給勇號畱閩副將甘大有毛惠德閩浙補用副將蕭寶林署廣東羅定協副將鄭紹忠均請

賞加總兵銜副將黃北海譚勝清黃喜光均請

賞給勇號擬保畱閩副將謝復雲副將睦金城擬保閩浙遇缺卽補副將鄒玉林戴清輝杜登雲吳茂軒均請

賞給勇號副將銜畱浙參將唐得勝副將銜參將柳玉清參將葉善明朱長林陳道亨戴榮陞均請

賞給勇號副將銜參將鄧榮佳請免補參將以副將儘先補用并賞加總兵銜副將銜畱閩參將會華國請以副將仍畱閩儘先推補畱浙參將陳得林參將王正明參將銜遊擊徐萬福均請以副將畱浙儘先補用副將銜畱浙參將張介和擬保副將銜畱浙參將鄒正魁畱浙參將伍先申均請以副將仍畱浙江補用參將黎東溪請以副將畱閩補用四川補用參將姜南金請以副將改畱

奏稿卷十六

查

廣東儘先補用副將銜參將蕭佑飛副將銜儘先參將余蘭桂儘先參將蕭長興參將林傳榜均請以副將畱浙補用擬保閩浙遇缺卽補參將張金榜陳厚順黃復勝擬保閩浙卽補參將余宏亮均請以副將仍畱閩浙補用遊擊張復順請以參將畱閩補用并賞加副將銜擬保畱閩遊擊劉甫田請以參將仍畱閩補用并賞加副將銜參將銜遊擊張逢春參將銜儘先遊擊張榮華遊擊廖得揚劉道得請以副將補用遊擊孫永忠陳得勝均請以參將畱閩補用遊擊銜儘先都司彭惟貴盛照魁遊擊銜都司萬起順黃仁山擬保都司秦添福均請以參將補用畱閩都司彭錫芝請以遊擊仍畱閩儘先補用并請

賞換花翎都司趙煥馳請以遊擊儘先補用并

賞加參將銜藍翎都司喻經魁請以遊擊補用并

賞換花翎擬保都司江同恩陳殿立葉義秀均請以遊擊卽補守備吳起順胡昌海范長春文希財均請以遊擊卽補廣東儘先都司鄧安邦請

賞加遊擊銜都司銜儘先守備朱芳遂請以遊擊畱閩儘先補用守備桂順傳請以都司畱閩儘先推補守備銜丁太洋請以都司畱閩儘先補用并請

賞戴花翎畱閩千總宛乾元請以都司仍畱閩儘先補用藍翎千總聶章壽程宏彪賀宋來邵添壽請以都司卽補并

奏稿卷十六

五

賞換花翎藍翎把總黃承佐請以千總卽補軍功王蓋臣劉忠發祝鑑廷均請以千總儘先拔補加守備銜并

賞戴藍翎軍功陳順和請以千總畱閩儘先補用并

賞戴藍翎擬保二品頂帶按察使銜浙江補用道李耀南請

賞加勇號按察使銜福建補用道朱明亮請

賞給二品頂帶記名閩浙道員魏光邴請

賞加鹽運使銜同知銜候選知縣丁華先請免補知縣以同知直隸州畱閩遇缺儘先補用畱浙補用從九品譚成章請以府經歷縣丞仍畱浙江遇缺儘先補用并

賞加鹽提舉銜其幫辦福建軍務二品頂帶前布政使銜浙江接

察使阿爾剛阿巴圖魯劉典浙江提督蘇博通額巴圖魯

賞戴雙眼花翎

賞穿黃馬褂一等子爵鮑超廣東陸路提督

賞穿黃馬褂穆特本巴圖魯高連陞

簡署浙江提督達春巴圖魯黃少春福建布政使達沖阿巴圖魯

王德榜統兵圍剿誓殄餘氛謀勇兼資勤勞懋著惟職分較崇

臣

等未敢妄擬甄敘應如何

獎勵之處出自

天恩其餘在事出力各員弁并請由 臣宗棠查明擇尤彙案保獎

擬保畱閩副將宋成祥十二日在塔子坳奮勇殺賊身受重傷旋

奏稿卷十六

奏

於十六日因傷殞命應請

旨敕部照副將陣亡例從優議卹并鮑超所部二十日陣亡之藍

翎守備鍾福春守備銜千總章邦俊藍翎千總余勝才藍翎把總

蕭大春方惠林藍翎外委王與志藍翎軍功王錫坤軍功王金玉

查成巷顧洪平汪心田朱福才何福興謝光輝汪炳林李桂芳李

正洪傅松亭梁大發梁英階張有登葉得勝劉亮順黃謙益桂明

東李振義何上交蕭連陞李國才周泰和朱進達呂士之溫同勝

潘文盛黃榮富蔣崇祺陳德貴劉炳榮戴雙福杜善功及追賊陣

亡之擬保守備顧惟奇藍翎千總李賢連均請從優議卹其顧惟

奇一員請照擬保官階優卹所有收復嘉應州城追剿竄賊全股

撲滅緣由謹合詞恭摺馳報伏乞
皇上聖鑒訓示施行謹 奏

軍機大臣奉

旨另有旨欽此

奏稿卷十六

卷

請 賞給劉典三代一品封典片

同治四年十二月二十九日

再查幫辦福建軍務二品頂帶劉典前在浙江按察使任內於同治二年九月十八日皖南軍次聞訃丁親父憂時皖浙軍務孔棘臣以劉典帶兵獨當一路奏請改爲署任浙江按察使俟軍務稍定准其回籍治喪事畢赴浙仍領原部劉典於是年十月二十一日由浙江嚴州營次請假奔喪回籍十二月十二日抵湖南甯鄉縣原籍三年二月初一日葬親事畢疊經臣檄催募勇剿賊於四月初旬由籍起程帶勇入江西助剿旋奉

恩命幫辦江皖軍務轉戰數月江省全境肅清復奉

旨開缺仍以二品頂帶幫辦福建軍務四年五月閩疆肅清劉典

奏稿卷十六

奏

呈請終制臣勉以勇於戰陣爲孝總期逆氛盡掃方釋仔肩半載以來屢援江粵嘉應被陷又自南雄兼程回剿自同治二年九月十八日聞訃起不計閏扣至同治四年十二月十八日已屆二十七箇月服闋劉典於同治二年十二月十二日回籍見喪至同治三年四月募勇赴江之日在籍居喪已逾百日自無庸補行守制惟劉典至性過人昨來營面晤服闋後仍穿用素服并堅請回籍守制臣以典禮攸關過猶不及見已服闋應卽據咨代爲恭報伏查劉典自幫辦福建軍務盡瘁馳驅忠勤卓著每戰必先與將校履勘地勢指畫攻守機宜以故所向克捷雖屢瀕危險弗顧也此次全股髮逆所以迅卽撲滅者由於十二日大捷汪逆陣斃賊眾

瓦解之故是戰賊傾巢冒死衝突兇悍實異尋常各軍縱橫血戰竟日克獲奇捷實由劉典先數日將數十里大小路徑預與各統領營官履勘指畫瞭如指掌故臨時衝堵抄截各盡其能雖汪逆胡逆百戰兇悖之餘終不能逃其規畫也其由湘奉

命赴江西之援保全贛西各郡嗣赴閩援力遏汀連竄衝會規漳郡旋因汪逆由鎮平竄至連平臣飛檄速赴江西南安廣東南雄

截賊入江竄湘之路比賊乘後路空虛復由連平竄陷嘉應意在

由閩入江臣時駐漳州率親兵八百出屯瑄溪飛檄各軍馳回防

勦而劉典聞警約黃少春星夜奔馳先到會昌偵賊猶踞嘉應卽

由上杭出大埔迅與臣會合攻勦相距較遠馳援最先卒能埽除

奏稿卷十六

堯

巨寇俾無遺種是劉典之功不可沒也劉典每與臣言及親喪未克終制私懷耿耿聲與淚俱臣察其至誠亦爲悽愴查該員以二品頂帶幫辦福建軍務例得三代二品封典茲當大局勘定可否賞給劉典三代一品封典俾慰孝思之處出自

皇上恩施伏乞

聖鑒施行謹 奏

軍機大臣奉

旨另有旨欽此

同治五年正月二十三日內閣奉

上諭劉坤一奏江西各軍勦賊大勝嘉應餘匪棄城宵遁本日復據左宗棠瑞麟郭嵩燾奏截勦竄匪連獲大捷餘孽蕩平各一招嘉應踞城髮逆自汪逆伏誅後僞偕王譚體元代統其眾與賊目胡瞎子等負隅死拒圖撲東路營壘經劉典高連陞等聯營進紮賊不敢犯上年十二月十九日方耀等軍敗賊於州西之七樹徑二十日賊犯鮑超營盤經鮑超督率唐仁廉等軍分路截殺斃匪四千餘名生擒老賊二百餘名逆賊膽落於二十二日夜潛啟西南門由小密出黃沙嶂而遁經劉明燈簡桂林賴長等立率所部疾追斃賊二千餘名生擒五百餘名高連陞黃少春劉清亮等聞

奏稿卷十六

五

賊宵遁卽率隊入城搜勦餘賊僞佐將劉廷貴等遂分投各營乞降維時高連陞王德榜康國器鮑超等軍均向黃沙嶂繼進賊之過黃沙嶂者劉明燈等緣崖衝擊乘勝痛勦勢等拉朽摧枯斬擒不可數計高連陞鮑超等軍復及賊於大田奮勇掩殺賊屍枕藉降其脅從萬餘人搜斬叛勇頭目歐陽輝及逆首賴裕新卽賴剝皮之母梟首軍前悍賊猶越嶺狂竄我軍四路搜殺又斃賊二千餘名丁賢發復生擒僞總統胡瞎子卽胡永祥餘眾悉降王德榜軍及賊於北溪賊無去路降者四萬餘人鮑超所部追賊至白沙壩賊目何明亮黃矮子等抗拒敗潰唐仁廉等繞出賊前鮑超親率十營合兵截殺賊屍徧野積械如山二十三、四等日共斃賊八

千餘名墮崖死者難以數計逆眾見四面被圍羅拜求生當將二萬餘眾一律兜擒查出僞天將何明亮等叛勇頭目黃矮子等陸續誅磔其僞侯丁德泰等大小頭目七百三十四名亦經訊明軍前正法逆首譚體元於黃沙嶂北槍傷墮馬落崖身死汪麻子亦中傷殞命殲除殆盡無一漏網粵逆自由閩竄江西入廣東復有叛勇合併爲一肆行兇悖各將士踴躍用命一句三捷將十餘年髮逆餘孽一鼓蕩平實足以伸天討而快人心聞浙總督左宗棠督辦軍務調度有方著賞戴雙眼花翎署兩廣總督廣州將軍瑞麟著賞還花翎三品頂帶署廣東巡撫郭嵩燾著賞給二品頂帶江西巡撫劉坤一著賞給頭品頂帶浙江提督一等子爵鮑超著

奏稿卷十六

三

再賞加一雲騎尉世職二品頂帶前浙江按察使劉典廣東提督高連陞均著賞給雲騎尉世職劉典并賞給三代一品封典記名提督婁雲慶著以提督遇缺儘先題奏仍交部從優議敘提督唐仁廉譚勝達曾成武黃少春福建布政使王德榜均著賞穿黃馬褂總兵孫開華著交軍機處記名遇有提督總兵缺出請旨簡放鄧訓誥著以提督遇缺題奏提督蕭得龍著賞換博奇巴圖魯名號劉清亮著賞換西林巴圖魯名號李運勝著賞換法什尙阿巴圖魯名號總兵黎榮鈞著賞換愛星阿巴圖魯名號劉明燈著賞給斐凌阿巴圖魯名號簡桂林等六員均著賞加提督銜內丁賢發并賞給伊勒達蒙額巴圖魯名號齊蘭禮著賞給該員三代二

品封典馬駿發著賞給直勇巴圖魯名號方耀著開復革職處分
副將龔占鼇張志公曹光德均著以總兵記名請旨簡放龔占鼇
并賞加提督銜張再勝等四員均著以總兵補用張再勝并賞給
彥勇巴圖魯名號賴光斗并賞給俊勇巴圖魯名號喻名揚并賞
給衝勇巴圖魯名號涂祖昌并賞給確勇巴圖魯名號副將賴長
著賞換剛安巴圖魯名號并賞加總兵銜徐連陞等三員均著免
補副將以總兵補用徐連陞并賞給勳勇巴圖魯名號江自康并
賞給強勇巴圖魯名號易進春并賞給勤勇巴圖魯名號副將宋
定元著賞給果勇巴圖魯名號陳集賢著賞給靖勇巴圖魯名號
甘大有等四員均著賞加總兵銜黃北海著賞給傑勇巴圖魯名

奏稿卷十六

五

號譚勝清著賞給信勇巴圖魯名號黃喜光著賞給鋒勇巴圖魯
名號謝復雲著賞給資勇巴圖魯名號睦金城著賞給志勇巴圖
魯名號鄒玉林著賞給安勇巴圖魯名號戴清輝著賞給佐勇巴
圖魯名號杜登雲著賞給碩勇巴圖魯名號吳茂軒著賞給綽勇
巴圖魯名號參將唐得勝著賞給勳勇巴圖魯名號柳玉清著賞
給爽勇巴圖魯名號葉善明著賞給制勇巴圖魯名號朱長林著
賞給勝勇巴圖魯名號陳道亨著賞給彰勇巴圖魯名號戴榮陞
著賞給敢勇巴圖魯名號鄧榮佳著免補參將以副將儘先補用
并賞加總兵銜曾華國著以副將仍畱福建儘先推補陳得林等
三員均著以副將畱於浙江儘先補用張介和等三員均著以副

將仍畱浙江補用黎東溪著以副將畱於福建補用姜南金著以副將改畱廣東儘先補用蕭佑飛等四員均著以副將畱於浙江補用張金榜四員均著以副將仍畱福建浙江補用遊擊張復順著以參將畱於福建補用并賞加副將銜劉甫田著以參將仍畱福建補用并賞加副將銜張逢春等四員均著以副將補用孫永忠等二員均著以參將畱於福建補用都司彭惟貴等五員均著以參將補用彭錫芝著以遊擊仍畱福建儘先補用并賞換花翎趙煥馳著以遊擊儘先補用并賞加參將銜喻經魁著以遊擊補用并賞換花翎江同恩等三員均著以遊擊即補守備吳起順等四員均著以遊擊即補都司鄧安邦著賞加遊擊銜守備朱芳遂

奏稿卷十六

三

著以遊擊畱於福建儘先補用桂順傳著以都司畱於福建儘先推補守備銜丁大洋著以都司畱於福建儘先補用并賞戴花翎千總宛乾元著以都司仍畱福建儘先補用聶章壽等四員均著以都司即補并賞換花翎把總黃承佐著以千總即補軍功王蓋臣等三名均著以千總儘先拔補并賞加守備銜賞戴藍翎陳順和著以千總畱於福建儘先補用并賞戴藍翎道員李耀南著賞給奮勇巴圖魯名號朱明亮著賞給二品頂帶魏光邴著賞加鹽運使銜知縣丁華先著免補知縣以同知直隸州知州畱於福建遇缺儘先補用從九品譚成章著以府經歷縣丞仍畱浙江遇缺先補并賞加鹽提舉銜其餘在事出力各員并著左宗棠查明擇

尤彙案保獎候旨施恩因傷殞命之擬保副將宋成祥著交部照副將陣亡例從優議卹并鮑超所部陣亡之藍翎守備鍾福春守備銜千總章邦俊藍翎千總余勝才藍翎把總蕭大春方惠林藍翎外委王與志藍翎軍功王錫坤軍功王金玉查成巷顧洪平汪心田朱福才何福興謝光輝汪炳林李桂芳李正洪傅松亭梁大發梁英階張有登葉得勝劉亮順黃謙益桂明東李振義何上交蕭連陞李國才周泰和朱進達呂士之溫同勝潘文盛黃榮富蔣崇祺陳德貴劉炳榮戴雙福杜善功及追賊陣亡之擬保守備顧惟奇藍翎千總李賢連均著交部從優議卹顧惟奇并著照擬保官階從優議卹以慰忠魂該部知道欽此

軍機大臣字寄同治五年正月二十三日奉

上諭本日據劉坤一奏江軍進逼嘉應獲勝會同收復州城并左宗棠瑞麟郭嵩燾奏收復嘉應州城追剿竄匪全股蕩平詳細情形各一摺覽奏曷勝欣慰業經明降諭旨宣示分別加恩矣逆匪盤踞嘉應州城屢思衝突出竄經左宗棠督飭江粵閩三省之軍面面兜擊遂使該逆無路可竄一鼓殲除深堪嘉尚惟投降之人爲數過多必須妥爲遣散分別安插方免後患閩粵地方向多土匪積年爲患亦應搜捕淨盡永絕根株并飭地方文武將應辦事宜認真妥辦毋稍大意所部各軍自應由左宗棠會同瑞麟郭嵩燾劉坤一酌量分別遣畱惟見在東南雖已肅清而捻匪竄擾北路

奏稿卷十六

壹

路楚豫等省到處戒嚴防剿正當喫緊鮑超一軍前本令其馳赴北路助剿此時粵賊業已辦結卽著左宗棠飭令統帶所部迅赴楚豫之交聽候會國藩調遣其江閩各路得力將弁兵勇有可調赴楚豫江皖助剿者并著會國藩迅速函商左宗棠等酌量調往以期厚集兵力早殄逆氛左宗棠等仍當聽候會國藩函商調派將士之信分別遣畱不得先將得力諸軍概行遣撤以顧全局將此由六百里各諭令知之欽此

鞠訊偽總統胡瞎子凌遲處決片

同治四年十一月二十九日

再臣宗棠正在繕摺拜發聞高連陞將偽總統胡瞎子卽胡永祥解送來營鞠訊供稱年三十三歲安徽東流縣人咸豐三年九月在安慶被偽丞相賴裕新擄至廬州厯隨賴裕新楊秀清陳玉成石達開彭大順童容海陳炳文汪海洋竄擾三江兩湖閩廣各省地方攻陷瑞州吉安邵武東安和平各府縣兩陷杭州汀州瑞金等城同治二年隨汪海洋踞餘杭結爲死黨本年夏閒在閩粵交界輾轉竄突被官軍擊敗奔竄鎮平官軍攻急復由大柘東石斜趨羅浮司至龍南旋由和平攻連平回紮上坪一月未打仗折回原路竄陷嘉應州城因官軍緊逼汪逆又死想衝粵軍營盤走黃沙嶂赴潮州再尋生路二十二夜首先開路走至北溪正擬紮營官軍追及因逃至長崑山坳旋被擒獲等語竊惟該逆與汪海洋在賊中最爲兇狡據供逆情不諱罪大惡極死有餘辜當卽凌遲處決以彰

天討而快人心謹附片具陳伏乞

聖鑒謹 奏

軍機大臣奉

旨知道了欽此

遊擊英秀罵賊殉難請

優卹建祠片

同治四年十二月二十九日

再查分駐嘉應之潮州鎮署左營遊擊英秀於上年賊蹤逼近嘉應時招集紳團力籌堵禦每慷慨自矢與城存亡本年十月二十一日髮逆竄陷州城時英秀倉卒登陴見賊眾已薄城下守卒星散知事不可爲以幼子屬一親兵攜之出走朝服坐堂手劒以待賊至大罵不絕口身被數創死於遊擊署左柚樹下賊歎其忠義就樹下掘坎瘞之將斫斷髮辮及冠服懸東門城外見者哀之該遊擊之妾呂氏同時殉節一女生甫六月亦被害據嘉應州紳士陝西補用同知直隸州張其勳稟報前來臣面詢該遊擊死狀甚悉不覺涕出聞其幼子經親兵負之走潮郡除飭廣東惠潮嘉道

奏稿卷十六

七

張銑訪求忠裔善爲存恤外并由臣捐廉贍助伏查潮州鎮署左營遊擊英秀視死如歸被害慘烈孤忠亮節凜然猶生應請

旨敕部從優議卹并於嘉應州建立專祠以慰忠魂而勵臣節謹附片具陳伏乞

聖鑒施行謹 奏

軍機大臣奉

旨英秀著從優議卹并准於嘉應州建立專祠該部知道欽此

